


妙法蓮華經指掌疏

卷二之上

BQ
2057
T85
1749a
v.6



法苑珠林卷二之上

釋迦牟尼佛在舍衛城祇樹園中

與諸比丘說法時

二上根獲益

妙法蓮華經譬喻品第三

譬喻品第三在後又令以易知譬喻

予得記為最善譬喻之旨

人使諸譬喻

以清淨心

諸人

諸人

法華指掌疏卷二之上

賢宗後學通理述 嗣法門人明遠較字

京西潭柘山岫雲寺監院比丘來琳督刊

二上根獲益

此處有通後品題。應先釋之。品題云。

妙法蓮華經譬喻品第三

譬喻正義尚在後文。今以品題寄居於此者。以身子得記。爲發請譬喻之端。故言身子若不得記。無人代請。譬喻無由而說。所謂若無漁父引。爭得見波濤也。若釋其義者。譬謂比類發明。喻謂託言訓曉。文云。諸有智者。以譬喻得解。故於法說之後。復

說譬喻品焉。又此品別有五義。一謂身子雖解。四子猶迷。譬喻酌請。俯就中根故。二謂三界無安。猶如火宅。譬喻形顯。令生厭離故。三謂三乘假立。猶如三車。譬喻發明。令知非真故。四謂一乘實相。猶如大車。譬喻稱揚。令知安住故。五謂先三後一。似近妄語。譬喻問答。審定不虛故。總則如來辯才無礙。權巧有方。究其玄微。則聲聞辟支等所不能知。託彼事相。令三乘五性等同沾法雨。其不自信者。特畫地以自限耳。此品豈獨爲中根說耶。此是通後品題

本科經文分三。

一身子領解。二如來與記。三時衆供養。

初二一長行二偈頌一長行分二一領解歡

喜二徵釋其由

初

爾時舍利弗踴躍歡喜卽起合掌瞻仰尊顏而白佛言。○今從世尊聞此法音。心懷踴躍。得未曾有。

初經家敘置踴躍者。心曠神怡。莫知所之之狀。歡喜者。自信作佛。憂疑頓釋之情。合掌者。端肅已躬身業精也。瞻仰者。注想聖容。意業專也。白佛者。陳詞呈解。口業殷也。○今從下身子自陳。因聞前來此等法音。了知自心作佛。喜出望外。若有不能自已。故云心懷踴躍。素恐絕分。一旦獲於不意。故云

得未曾有。

二徵釋其由。二一昔日疑悔。二今日信解。初

三一對境傷感。二獨處思惟。三常時剋責。初

所以者何。我昔從佛聞如是法。見諸菩薩受記作佛。而我等不預斯事。甚自感傷。失於如來無量知見。

首句寄言總徵。我昔下。且明傷感。昔指方等般若。言方等般若之時。亦說真實之法。亦記菩薩作佛。由方等爲三乘共會。般若命三乘轉教。故得聞得見也。雖得聞得見。而不得參預菩薩。同受記莚。故云不預斯事。大小相形。不能自安。故云甚自感傷。

無量知見。卽十力解脫等。是諸佛果所證法。旣不得記。於此俱應無分。故名爲失。此感傷之不能已也。

二獨處思惟

世尊。我常獨處山林樹下。若坐若行。每作是念。我等同入法性。云何如來以小乘法而見濟度。○是我等咎。非世尊也。○所以者何。若我等待說所因。成就阿耨多羅三藐三菩提者。必以大乘而得度脫。然我等不解方便。隨宜所說。初聞佛法。遇便信受。思惟取證。初疑佛有私。二乘厭塵趣寂。故常獨處。山林者。闡

寂之地。樹下者。曠絕之境。處此地境時。形影相吊。淪落堪憐。較之對境逢緣。更爲難安。故於若坐若行。每每作是念也。三乘同斷見思。同證五分法身。故云同入法性。然不知有住與不住之別。故反怪聖心有私。云何者。怪疑之詞。意謂我與菩薩。同入法性。理宜等心相濟。云何如來獨以小乘之法。見濟我等。將非聖心有私耶。○是我下。引過歸已。意謂我於閒居獨處之時。初疑佛心有私。旣而思之。是我等樂小之咎。非世尊果有私於彼也。○所以。下。徵起釋成。因猶爲也。意謂佛於阿含會上。初說

小乘亦爲成就菩提。但以時未至。故不曾說出。若我等虛心遠圖。待佛說出。所爲成就菩提者。必當如諸菩薩。以大乘得度。以是而思。非世尊之私也。然字有慨悔昔非之意。意謂從前四諦方便。本屬隨宜所說。悔我等不解此意。初聞佛法。不別真僞。遇便信受。當時思惟。只圖取證之速。後來不意。竟成焦芽敗種。以是而思。非我等之咎乎。

三常時剋責

世尊。我從昔來。終日竟夜。每自剋責。

自述方等般若。以至今日。故云我從昔來。白日難

安。清夜猶慚。故云終日竟夜。自思冠天履地。同爲物靈。薙髮染衣。均稱佛子。寧可獨滯小乘。永失勝利。故每自剋剗其心。責備於已也。然此昔日剋責。正今日之悟機。較之四子。自謂已得涅槃等。心志霄壤矣。昔日疑悔竟。

二今日信解

而今從佛。聞所未聞。未曾有法。斷諸疑悔。○身意泰然。快得安隱。今日乃知真是佛子。從佛口生。從法化生。得佛法分。

初聞法斷疑。聞所未聞者。會權歸實。不同方便之

法素所習聽也。未會有法者。記小同大。不同方等般若。獨記菩薩也。疑謂疑已絕分。悔謂悔前欲速由聞會權歸實。了知無權不實。故云斷耳。○身意下。歡喜自信。疑悔俱斷。內外舒暢。故云身意泰然。從此慶快平生。無復傷感疑怪。尅責等情。故云得安隱也。今日乃知者。翻昔不知也。以從前不預斯事。將謂絕分故。真是佛子者。翻昔似子也。以從前不契佛心。似子非真故。從佛口生者。親受記莂。從法化生者。轉小爲大。得佛法分者。漸臻極果。此卽所謂心生大歡喜。自知當作佛也。長行竟。

二偈頌

標頌云

爾時舍利弗欲重宣此義而說偈言。

正頌分二

一頌頌解歡喜二頌徵釋其由

初略經家敘廣自陳語

我聞是法音得所未曾有。心懷大歡喜疑網皆已除。
昔來蒙佛教不失於大乘。佛音甚希有能除衆生惱。
我已得漏盡聞亦除憂惱。

向謂絕分今知成佛故云得未曾有。憂疑頓釋慶
快非常。故云懷大歡喜疑有三種。後云自惟失此
利疑自非器也。次云將非魔作佛疑師非人也。又
云惱亂我心耶疑法非真也。三疑橫胸結縛正智。

故名疑網。既聞會權歸實。瓦解冰消。故云已除。此正頌長行義也。昔來二句。乃自述慶快之意。意謂昔蒙佛教。但證偏真。自謂失於大乘。今聞會權歸實。乃知不失。其慶快爲何如哉。佛音下。乃稱讚權實之語。昔日權說。今日實教。皆爲佛音。通爲安隱。無非饒益。故甚希有。如初說三乘。能除衆生衆苦逼迫之惱。權音豈不甚希有乎。又如我昔已得漏盡。尚有不預斯事。甚自感傷之憂。終日竟夜。每自尅責之惱。今聞一乘。自知從佛口生。從法化生。得佛法分。從前憂惱。亦得除滅。實音豈不甚希有乎。

是則權實皆為希有。始終常受佛恩。所謂大千莫
酌累劫難報者。此也。

二頌徵釋其由

偈無徵詞。科順長行。

分二

一頌昔日疑悔

二頌今日信解

初三

一頌獨處思惟二頌常

時尅責三頌對境傷感

初

約義超頌

我處於山谷。或在林樹下。若坐若經行。常思惟是事。
嗚呼深自責。云何而自欺。我等亦佛子。同入無漏法。
不能於未來。演說無上道。金色三十二。十力諸解脫。
同共一法中。而不得此事。八十種妙好。十八不共法。
如是等功德。而我皆已失。○我獨經行時。見佛在大

衆名聞滿十方。廣饒益衆生。自惟失此利。我爲自欺誑。

初頌疑佛有私。山谷者。謂山石空隙之處。若坐若行者。雙標二儀也。嗚呼等。且約獨坐時言。以向下引過歸已。在獨行時故。嗚呼者。愁歎聲。言身子於山林獨坐之時。寂寞難堪。反思已躬。未全道業。故嗚呼作愁歎聲而自責也。云何者。自惟自責之詞。意謂四諦方便。本屬隨宜。不別真僞。遇便信受。云何認雹爲珠。自相欺誑。已至此乎。大小雖異。同爲及門之徒。故云我亦佛子。見思通惑。三乘同斷。故

云同入無漏。雖同入無漏。而如來獨記菩薩。不記聲聞。故云不能於未來演說無上道。以記尚不得。豈能成佛演法乎。金色指身言。以佛身如金光聚。故三十二指相言。始從頂上肉髻。終至足下安平。皆以因修百福所致。十力解脫如前。同共一法者。謂同一師承。非有邪正之異。共一時世。非有正像之別。故雖師無邪正之異。時無正像之別。然於身相力解等事。自揣無分。故云而不得也。妙好者。隨形之好。惟佛能有好之至極。故稱爲妙。始自無見頂。終至手足有德。共有八十。不共法者。不與二乘

等共故。始自身無失。終至智慧。知現在世無礙。共有十八。如是皆以積功累德所致。故稱功德。承前身相尚不能得。安望隨好。力解尚不能具。豈獲不共。故云皆已失也。然此中不能不得已失等字面。寓有疑佛之意。意謂我與菩薩同爲佛子。同入無漏。同共一法。何獨彼能而我不能。彼得而我不得。彼不失而我獨失。將謂佛心無私。恐未然也。○我獨下。頌引過歸己。我獨經行時。單已無眷屬也。見佛在大衆。天人咸恭敬也。名聞滿十方。德譽隆沙界也。廣饒益衆生。化道周品類也。失利之事有三。

一謂單已無從。不比諸佛人天侍衛。二謂孤丁無聞。不比諸佛德譽隆彰。三謂自行獨善。不比諸佛化道徧周。凡此皆失利之事。不得不展轉以自惟也。我爲句。正引過自歸之意。意謂我昔獨行見佛雲泥有感。初以失利自惟。旣而思之。非真有失。由我得少爲足。不復進求。爲自欺以自誑耳。

二頌常時尅責

超頌

我常於日夜。每思惟是事。欲以問世尊。爲失爲不失。雖引過自歸。終是惟恐或失。故日夜思惟。思惟寓尅責意也。失與不失。究竟不能自決。故欲問世尊。

欲問卽求決意也。

三頌對境傷感

追頌

我常見世尊。稱讚諸菩薩。以是於日夜。等量如是事。
承上日夜思惟。欲問世尊者。非無所因而然也。蓋
以我於方等般若之時。常見世尊。稱讚菩薩。與之
授記。以是於夙興晏寐之際。終日竟夜之時。等量
是事。何如龍若象之褒如彼。而跛贅癩驢之誚如
我。此傷感之情。有莫可禁也。頌昔日疑悔竟。

二頌今日信解二 一頌聞法斷疑二頌歡喜自

信 初二 一遠斷昔疑二近斷前疑

初廣頌

今聞佛音聲。隨宜而說法。無漏難思議。令衆至道場。
我本著邪見。爲諸梵志師。世尊知我心。拔邪說涅槃。
我悉除邪見。於空法得證。爾時心自謂。得至於滅度。
○而今乃自覺。非是實滅度。若得作佛時。具三十二
相。天人夜叉衆。龍神等恭敬。是時乃可謂。永盡滅無
餘。

初因悟述迷佛音聲。指前廣明權實之語。前云是
法非思量分別之所能解。又云是法皆爲一佛乘
故等。皆明隨宜說法。無漏難思議義也。旣隨宜說
法。難思難議。則知如來但化菩薩。惟以佛之知見

示悟衆生。故云令至道場。此今日得悟之因也。由今日之悟。自述昔年之迷。故云本着邪見。本着邪見者。未遇佛時。原依沙然梵志。習外道法。故沙然死後。身子自率邪徒。故云爲梵志師。梵志者。西域外道也。其人自稱梵天苗裔。志生梵天。身子窮盡其法。更求勝師。路逢馬勝尊者。引見世尊。世尊對症施藥。爲說小乘之法。故自述世尊知我心。拔邪說涅槃也。初聞佛法。遇便信受。故云悉除邪見。思惟修習。取證偏真。故云空法得證。當爾之時。不知權滅非真。竟爾認奴作郎。故自謂得至滅度。此昔

年執迷之情也。○而今下翻迷成悟。從前執權爲實。如同醉夢。今聞會權歸實。如夢覺醉醒。故云白覺。又自覺者。顯是真覺實悟。若知解宗徒。一味隨人起倒。豈自覺乎。若得作佛時者。雖非楷定之語。已知作佛有分。不同前云不能於未來演說無上道也。具三十二相者。旣得作佛。必具相好嚴身。不同前云同共一法中。而不得此事也。天人夜叉衆龍神等恭敬者。旣具相好。必有八部侍衛。不同前云我獨經行時。自惟失此利也。當是時也。可謂真窮惑盡。似金出鑛。如木成灰。故云盡滅無餘。

二近斷前疑

補頌

佛於大衆中說我當作佛聞如是法音疑悔悉已除
初聞佛所說心中大驚疑將非魔作佛惱亂我心耶
○佛以種種緣譬喻巧言說其心安如海我聞疑網
斷佛說過去世無量滅度佛安住方便中亦皆說是
法現在未來佛其數無有量亦以諸方便演說如是
法如今者世尊從生及出家得道轉法輪亦以方便
說世尊說實道波旬無此事以是我定知非是魔作
佛我墮疑網故謂是魔所爲

初因信述疑準前結勸信解文云汝等旣已知諸

佛世之師。隨宜方便事。無復諸疑惑。心生大歡喜。
自知當作佛。是佛於大衆之中。說以當作佛也。向
以不得成佛爲疑。故有每自尅責之悔。今聞成佛。
二心俱斷。故云聞是法音。疑悔悉除。初聞佛說。指
前略明中。稱嘆實智之語。乍聞此語。不知何因何
緣。故大驚疑。其意以爲將非魔化作佛。惱亂我心。
令退道果耶。但彼時未敢出口。至今自信之後。乃
發露耳。○佛以下。斷疑生信。過去未來。盡屬因緣。
將他顯已。卽是譬喻。是皆如來爲酌前請。分別解
說。故云巧言說也。當其正聞之時。其心已安。如大

海之澄湛不動。旣聞法已。其疑又斷。如正智之網。羅水釋。此略明斷疑生信意也。佛說過去等。復約前來自他權實之義。以詳明之。過去諸佛。莫不從實施權。故云安住方便。亦莫不會權歸實。故云亦說是法。現在未來等可知。此述諸佛權實中義。如今世尊等。復述自證權實中義。生及出家。俱是如來大悲之心。故前但云爲是衆生。起大悲心。卽攝生及出家之義。得道者。卽前始坐道場等。轉法者。卽前趣波羅奈等。亦以方便說。是施權與諸佛同也。世尊說實道者。言世尊雖施權乘。究竟爲說實。

道是顯實與諸佛同也。波旬此云惡者。卽魔之異名。然彼縱懷惡心。惱亂行人。豈能備達權實。一如諸佛儀式。故云無此事也。以是之故。定知前來稱嘆實智。非魔作佛。乃世尊要說真實。皆以我之智識狹劣。自墮疑網。妄謂是魔所爲。幾將如來一片婆心。擲於無有之鄉矣。此亦身子自肯自信之後。披肝瀝膽之語也。頌聞法斷疑竟。

二頌歡喜自信

聞佛柔軟音。深遠甚微妙。演暢清淨法。我心大歡喜。疑悔永已盡。安住實智中。我定當作佛。爲天人所敬。

轉無上法輪。教化諸菩薩。

佛有八音。一極好。二柔軟。三和適。四尊慧。五不女。六不誤。七深遠。八不竭。今以分別解說。善順衆情。可當第二。故云柔軟深固幽遠。無人能到。可當第七。故稱深遠。言甚微妙者。好之至極。不可以言語形容。亦卽八音之一。極好音也。演暢者。宣演舒暢。清淨者。實相之法。以此法久抑在懷。未得宣演舒暢。至今時至機熟。乃以柔軟之音。深遠微妙之語。而演暢之。大歡喜者。自信作佛。喜逾尋常故。疑者五鈍之一。於諸諦理猶豫爲性。能障不疑善品爲。

業悔者不定心所之一。惡所作業追悔爲性。障止爲業。今以會權歸實。不疑現證。無權不實。不悔先作。故云永已盡也。實智無方。徧在諸法。由一向棄海認漚。決定惑爲色身之內。今聞法住法位。世相常住。乃知若身若心。咸是妙明真心中物。故云安住。所謂經行及坐卧。常在於其中也。定當作佛者。旣住實智。則咳嗽掉臂。無非佛事。從此積功累德。自然成佛無疑。所謂乘是寶乘。直至道場是也。天人所敬者。旣成佛道。自有天人敬仰。轉無上輪者。雖說諸法。究竟惟爲一乘。然能被之教。旣惟爲一。

乘則所化之機。豈實存餘衆。故云教化菩薩。必兼
天人敬仰。轉法化衆言者。正以見信之真而無疑
矣。然身子於未悟之前。動云不得此事。我皆已失。
爲失不失等。其語何其慘傷。今既悟之後。便云定
當作佛。天人所敬。教化菩薩等。其語何其雄毅。所
謂虎子初生。便有食牛之氣者。其身子之謂歟。身
子領解竟。

二如來與記二 一開迹顯本二正與授記 初
爾時佛告舍利弗。吾今於天人沙門婆羅門等大眾
中說。我昔曾於二萬億佛所。爲無上道故。常教化汝。

汝亦長夜隨我受學。我以方便引導汝故。生我法中。
○舍利弗。我昔教汝志願佛道。汝今悉忘。而便自謂
已得滅度。我今還欲令汝憶念本願所行道故。爲諸
聲聞說是大乘經。名妙法蓮華。教菩薩法。佛所護念。
初先示本迹。當爾身子領解之時。佛欲與記。先令
自識宿因。故告之也。必於衆中說者。有二義。一欲
記身子。令作證故。二恐衆有疑。示記因故。二萬億
佛。文雖未出其名。以義揆之。應指威音王佛。以如
來於彼佛所。曾爲不輕。修菩薩行故。欲求無上菩
提。一音徧記四衆。故云爲無上道。常教化汝。然彼

時雖蒙音記。尙爲無明所覆。反恣毀謗。同如長夜。但一音甫及於耳。佛種已納於心。卽是受學。亦如夢沉長夜之人。暗投寶珠。反作寢語罵之。但珠旣在懷。不可謂不蒙其利也。威音之後。復以權宗接濟。故云方便引導。緣合時熟。今值世尊受化。故云生我法中。○舍利下。正與開顯。佛爲不輕時。初以一音徧記。後復增壽說經。化千萬億衆。令住阿耨菩提。故云我昔教汝。志願佛道。中以梵志乞眼。退失大心。至今未復。故云汝今悉忘。由悉忘故。執權爲實。故云而便自謂已得滅度。佛意不欲令至滅。

度。故云還欲令汝憶念所行。由此因緣。乃說法華。
故云爲諸聲聞說是大乘等。據此則身子緣在多
劫。而向下之授記成佛者。有由來矣。開迹顯本竟。
二正與授記二 一長行二偈頌 初四 一行
因得果二依正莊嚴三主伴壽量四遠近化事

初

舍利弗。汝於未來世。過無量無邊不可思議劫。供養
若干千萬億佛。奉持正法。具足菩薩所行之道。○當
得作佛。號曰華光如來。應供。正徧知。明行足。善逝。世
間解。無上士。調御丈夫。天人師。佛。世尊。

初經刳行因。夫業識迂濶。如千尋大海。非一勺而
可竭。佛道長遠。若九仞重樓。非一級而可陟。故須
過無量等刳而研斷之。供佛致福。奉法修慧。福慧
圓滿。故云具足菩薩所行之道。問。前云但有聞法。無不成佛。此則經
刳行因。方能具足。何前後易難。相背若是。答。前恐
權教著相人等。不達卽心卽佛。動謂佛道長遠。不
易可得。由此深生畏懼。自甘絕分。故世尊以但有
聞法。無不成佛示之。此恐圓教狂慧人等。不解從
性起修。動謂把臂諸佛。齊肩聖賢。由此大言不慚。
頓蠲修證。故世尊以經刳行因。乃得成佛示之。若
是則前後各有取義。不惟不相背。而
反相爲用矣。此語豈獨爲身子說哉。○當得下。當
成果號。別號華光者。華彰富麗表福。光顯照耀表
慧。以因中供佛奉法。故果受斯稱。又旣得成佛。如

大夢覺。似蓮華開。故以華名。說法度生。如燈照夜。似炬消暗。故以光稱。又佛卽體大。法身德也。華卽相大。解脫德也。光卽用大。般若德也。蓮師彌陀序云。舉其名兮。兼衆德而俱備。故知佛德無盡。名義無窮。惟體之於心。則統攝無遺矣。

二依正莊嚴四 一國土嚴淨二三乘具足三劫名殊勝四菩薩充滿 初

國名離垢。其土平正。清淨嚴飾。安隱豐樂。天人熾盛。琉璃爲地。有八交道。黃金爲繩。以界其側。其旁各有七寶行樹。常有華果。

首句標名。次句下顯相。其土平正者。非若今之坑
坎堆阜。高下不平也。清淨嚴飾者。非若今之雜穢
充滿。便利不淨也。安隱豐樂者。非若今之八苦交
煎。豐歉不常也。天人熾盛者。非若今之三途充滿。
天人減少也。琉璃爲地者。非若今之土石諸山。沙
礫徧布也。有八交道者。非若今之關山難越。往來
不通也。黃金界側者。非若今之轍迹縱橫。觸向輒
軻也。旁有寶樹者。非若今之荆棘塞道。動止留礙
也。常有華果者。非若今之春榮秋枯。遷變無恒也。
若此者。皆由菩薩淨心所現。所謂心淨則佛土淨。

法華指掌疏
也。

二三乘具足

華光如來亦以三乘教化衆生。舍利弗。彼佛出時。雖非惡世。以本願故。說三乘法。

三乘度生。諸佛同軌。身子成佛。率由舊章。故云亦

以三乘教化衆生。此正明也。舍利下防問。

恐承上問云。諸

佛出於五濁惡世。故說三乘之法。今國名離垢。彼應非惡世。亦以三乘化生。何所爲乎。故此防云。彼

佛出時。雖非惡世。

云。

本願說三有二義。一報恩。

二攝生。報恩者。身子自念。從前退失大心。由安住

方便。方能漸臻極果。發願成佛時。說三乘法。報接

濟之恩故。攝生者。身子自念。從前墮落凡外。若不遇權宗。必當永受淪溺。發願成佛時。說三乘法。攝當墮之生故。此皆以義推也。

三劫名殊勝

其劫名大寶莊嚴。何故名曰大寶莊嚴。其國中以菩薩爲大寶故。

首句標名。次句徵起。末句釋成。雖三乘俱寶。惟以菩薩爲大。以羽翼法化。續佛慧命。攝化衆生。爲道統所繫故。正量論云。以菩薩立名者。如楚書不寶金玉。而寶善人之類。

法華指掌疏
四菩薩充滿

彼諸菩薩。無量無邊。不可思議。算數譬喻。所不能及。非佛智力。無能知者。○若欲行時。寶華承足。○此諸菩薩。非初發意。皆久植德本。於無量百千萬億佛所。淨修梵行。恒爲諸佛之所稱歎。○常修佛慧。具大神通。善知一切諸法之門。質直無僞。志念堅固。○如是菩薩。充滿其國。

初數量衆多。盡大海之可飲。數量無窮。極虛空之可度。邊際叵測。故云無量無邊。非心路之可及。非言道之可通。故云不可思議。算師及資。莫之能計。

恒沙地塵。不足爲比。故云算數譬喻所不能及。無分別智。觸處洞然。降斯以還。隨分成滯。故云非佛智力。無能知者。○若欲下。儀表非常。寶取真實。華表因行。足顯進趣。言此菩薩。皆是以真實因。趣無爲果。故以寶華承足表之。○此諸下。德本深厚。因深緣勝。故曰非新發意。根確蒂固。故曰久植德本。佛所修行。顯幹蠱之深。釋上久植德本義也。諸佛稱歎。顯護念之勝。釋上非新發意義也。○常修下。願力弘深。常修佛慧者。佛道誓成願也。以誓期必成。故慧須常修。具大神通者。衆生誓度願也。以誓

期普度。故通須具大善知法門者。法門誓學願也。以誓期盡學。故門須善知。質直無僞者。煩惱誓斷願也。以誓期俱斷。故治須絕本。質直則內外一如。無僞則虛妄不起。正以絕煩惱之本也。如上四願。不退不屈。故曰志念堅固。如云虛空有盡。願力無窮是也。○如是下。總結充滿。然此亦由未成佛時。因心願行所致。淨名云。直心是菩薩淨土。菩薩成佛時。無諂曲衆生來生其國等。足證此義。依正莊嚴竟。

三主伴壽量

舍利弗。華光佛壽十二小劫。除爲王子。未作佛時。其國人民壽八小劫。

佛壽十二小劫者。但就一期事畢而論。要知法身不墮諸數。豈華光佛猶爲王老師之兒孫乎。除爲王子。未作佛時者。惟約成道以後。滅度以前。兩楹中間說爲十二小劫。人民壽八小劫者。淨國善世壽命自長。若論世相常住。豈八劫之可局哉。

四遠近化事

華光如來。過十二小劫。授堅滿菩薩阿耨多羅三藐三菩提記。告諸比丘。是堅滿菩薩。次當作佛。號曰華

足安行。多陀阿伽度。阿羅訶。三藐三佛。隨其佛國土。亦復如是。○舍利弗。是華光佛滅度之後。正法住世。三十二小劫。像法住世。亦三十二小劫。

初記授堅滿。過十二劫。將臨滅度時也。將臨滅度。授堅滿記者。續此道度此生。爲滅後不盡之益故。菩薩名堅滿者。願必期於有成。行必期於有終。乃任重道遠。不夭不闕之稱也。告諸比丘者。對衆表揚。顯非私授也。因中寶華承足。果號華足安行。顯因果一致也。多陀阿伽等。舉三號攝餘號也。如如來。卽攝善逝。及無上士調御丈夫。以自證無上真。

如來爲調御。方能逝而無逝。來而無來。名曰如來。
應供。卽攝明行足。及天人師。以福慧雙足。模範人
天。方可應受人天供養。正徧知。卽攝世間解。及佛
陀耶。以三覺圓明。善解三世問法。方稱正徧知者。
旣統該衆德。則超出一切。亦攝世尊。故經中或俱
列十號。或略言三號。而義無殊也。土亦如是者。謂
華足依報。亦如華光無異也。○舍利下。法住劫數。
正像俱三十二者。華光願重衆生緣深所致。釋正
像之義者。法初盛行。人能現量體悟爲正。去聖漸
遠。現量者希。惟以比量倣效爲像。正法時。教理行

果備具。像法時。有教理行無果。及乎末法。則空騰似量。荒唐無實。雖有教理。行果俱無。今爲顯示殊勝。令生欣取。故不言末法也。長行竟。

二偈頌

標頌云

爾時世尊。欲重宣此義。而說偈言。

正頌分二

一正頌長行二結勝勸喜 初四 一頌行因得

果二頌依正莊嚴三頌主伴壽量四頌遠近化事

初

舍利弗。來世成佛。普智尊。號名曰華光。當度無量衆。○供養無數佛。具足菩薩行。十力等功德。證於無上。

道。

初超頌當成果號。成佛普智尊者。既成佛果。無智不具。在處稱尊。故當度句。義攝三乘具足。合在下科。佛隨便超頌於此。○供養下。追頌經劫行因。菩薩行者。指權智中差別行門。利他法也。十力等。指實智中差別功德。自利法也。二利具足。二智成就。故云證無上道。

二頌依正莊嚴

過無量劫已。劫名大寶嚴。○世界名離垢。清淨無瑕穢。以琉璃爲地。金繩界其道。七寶雜色樹。常有華果。

實。○彼國諸菩薩。志念常堅固。神通波羅密。皆已悉具足。於無數佛所。善學菩薩道。如是等大士。華光佛所化。

初二句。超頌劫名殊勝。○世界下。追頌國土嚴淨。坑坎堆阜。曰瑕垢。汚便利。曰穢。餘同長行。不頌三乘具足者。義見於上故。○彼國下。略頌菩薩充滿。諸菩薩。顯數量衆多。志念固。明願力弘深。神通準前。六波羅密。卽開三願。能遮六蔽。斷煩惱也。能開萬行。學法門也。能到彼岸。成佛道也。於無數佛所者。見德本深厚也。悲智雙運。自他兼利。故曰善學。

菩薩又學而稱善者。從性起修。不住於相故。如是等大士。既爲華光所化。則感恩不去。長行所謂如是菩薩充滿其國者。以此。

三頌主伴壽量

佛爲王子時。棄國捨世榮。於最末後身。出家成佛道。華光佛住世。壽十二小劫。其國人民衆。壽命八小劫。諸佛出世。必托王位者。有三義。一顯佛位尊極。無過上故。二顯世間富貴。不足恃故。三令邪見衆生。知尊敬故。願廢叢爾之區。希望三千之境。故曰棄國。不戀虛空之華。冀得真常之樂。故曰捨榮。惟此

一生因圓果滿。故曰於最後身。卽此一身。離俗證真。故曰出家成道。自此以後。方論住世劫數。長行所謂除爲王子。未作佛時是也。

四頌遠近化事

前略記授堅滿。後補舍利流布。長行偈頌。義互出也。

佛滅度之後。正法住於世。三十二小劫。廣度諸衆生。正法滅盡已。像法三十二。○舍利廣流布。天人普供養。

初頌法住劫數。正法住世時。十人出家。十人成道。故云廣度衆生。○舍利下。舍利流布。廣流布者。天上人間。遺舍利以作佛事故。普供養者。起塔造廟。

嚴供具以修福田故。正頌長行竟。

二結勝勸喜

華光佛所爲其事皆如是。其兩足聖尊最勝無倫匹。
○彼卽是汝身。宜應自欣慶。

初結勝。爲猶作也。所爲者。謂果上之報。皆以因所作故。如今所說。絲毫不爽。故曰事皆如是。二嚴俱備。超出群品。故曰兩足聖尊。不惟九界稱尊。諸佛亦遜一籌。故曰最勝無匹。○彼卽下勸喜意。謂彼佛卽是汝身。依正更非他有。況苦海無邊。今得涯矣。佛果無上。今有望矣。故宜自生欣慶。如來與記。

竟。

三時衆供養二。一總明衆供。二別明天供。初爾時四部衆比丘比丘尼優婆塞優婆夷天龍夜叉乾闥婆阿修羅迦樓羅緊那羅摩睺羅伽等大衆見舍利弗於佛前受阿耨多羅三藐三菩提記。心大歡喜。踊躍無量。各各脫身所著上衣。以供養佛。

此中四衆八部。多是大權示現。默契聖心。鼓舞中下。故見身子受記。而歡喜踊躍也。又歡喜踊躍者。自信作佛故。上衣者。衣中之上。脫以供佛。表爲法無悋故。又借此爲因。希望佛果故。

二別明天供二。一經家敘供二諸天陳詞。初釋提桓因。梵天王等。與無數天子。亦以天妙衣。天曼陀羅華。摩訶曼陀羅華等。供養於佛。○所散天衣。住虛空中。而自迴轉。○諸天技樂。百千萬種。於虛空中。一時俱作。雨衆天華。

初總表福慧。別明釋梵等供者。供異前衆故。供後有言故。衣以嚴身表福。華以開敷表慧。用以供佛者。表所作福慧。回向佛道也。○所散下。別表福業所作福業。三輪體空。不住於相。故以天衣住空。而自迴轉表之。迴轉者。旋繞不住之狀。○諸天下。別

表慧業。所作慧業。皆以文字助成。故以技樂百千等表之。於空中作者。表文字性空也。文字性空。而慧業得成。故以雨衆天華表之。

二諸天陳詞二 一歷敘聖教二稱讚回向 初而作是言。佛昔於波羅奈。初轉法輪。今乃復轉無上最大法輪。○爾時諸天子。欲重宣此義。而說偈言。昔於波羅奈。轉四諦法輪。分別說諸法。五衆之生滅。今復轉最妙。無上大法輪。

初長行。初轉法輪者。施權之始。今轉無上等。顯實之終。此亦領前如來權實。而歷以敘之。○爾時下

偈頌。正頌中分別說諸法者。如苦分三八。集分二五。道分七科。滅分餘無等。差別不同故。五衆卽陳如等五人。之猶至也。生滅者。四諦有四。一生滅四諦。謂苦則三相遷移。集則四心流動。道則對治易奪。滅則滅有還無。此當小教之義。二無生四諦。謂苦無逼迫相。集無和合相。道不二相。滅無生相。此當始教空宗。及頓教中少分之義。三無量四諦。謂苦則十界果報不同。集則五住煩惱不同。道則諸波羅密不同。滅則恒沙佛法不同。此當終教。及始教相宗一分之義。四無作四諦。謂苦則陰入皆如。

無苦可離。集則塵勞本淨。無集可斷。道則邊邪皆
中正。無道可修。滅則生死卽涅槃。無滅可證。此當
圓教。及頓教中多分之義。據此。則五衆所至。惟齊
生滅分齊。故云之生滅也。又五衆卽是五陰。以陰
有和合義。故生滅卽是無常。謂旣說四諦。復說五
陰。無常義也。妙而言最者。揀非方等般若。對麤言
妙故。大而言無上者。揀非始終二教。對小言大故。
二稱讚回向

是法甚深奧。少有能信者。我等從昔來。數聞世尊說。
未曾聞如是深妙之上法。○世尊說是法。我等皆隨。

喜。大智舍利弗。今得受尊記。我等亦如是。必當得作佛。於一切世間。最尊無有上。佛道叵思議。方便隨宜說。我所有福業。今世若過世。及見佛功德。盡回向佛道。

初指法稱讚。是法指今之所轉。惟佛與佛。乃能究盡。故甚深奧。聲聞辟支。所不能及。故少信者。從昔以來。數說權宗。諸天莫不在座。故曰數聞深妙上法。從不開演。至今方乃吐露。故曰未聞。○世尊下。述信回向。隨喜者。揀非當機。謂隨從法會。成歡喜益。故當機既得受記。隨喜亦可成因。故曰必當作。

佛既得作佛。亦必超出世間。故曰最尊無上。最尊無上。所證自然莫及。故曰道叵思議。道叵思議。亦必分乘隨語。故云方便隨說。必兼道後化法言者。正見其信之篤也。所有福業。卽戒善所積。有漏之因。或現在所積。未來當受。或過去所積。現在當受。總而言之。故曰今世過世。見佛功德。應屬慧業。以見佛必聞法故。然此福慧。向屬有漏。今以有漏之因。趣無爲果。故曰回向佛道。此亦因聞微因散善。皆成佛果。故作如是語也。又此中諸天。雖在隨喜之數。吐氣發聲。別具一種知見。請觀必當作佛。回

向佛道等語。非寄位聖賢及宿緣深厚者。孰能如此發真實信。拈莖草作丈六身哉。三請中判爲上根者。以此法說一周被上根已竟。

二喻說一周被中根四 一身子代請二如來許說三正說譬喻四中根獲益 初

爾時舍利弗。白佛言。世尊。我今無復疑悔。親於佛前。得受阿耨多羅三藐三菩提記。○是諸千二百心自在者。昔住學地。佛常教化言。我法能離生老病死。究竟涅槃。是學無學人。亦各自以離我見。及有無見等。謂得涅槃。而今於世尊前。聞所未聞。皆墮疑惑。○善

哉世尊願爲四衆說其因緣令離疑悔。

初自陳已悟前聞分別解說了知自心作佛故云
無復疑悔無疑悔故蒙佛印許當成故云親得受
記○是諸下悲他尚迷已證我空智脫界繫故云
心自在者昔住學地指未證無學時說未證無學
佛令研真斷惑故云常教化言我法能離生老病
死者教以斷惑之言以斷集方能離苦故究竟涅
槃者教以研真之言以修道方能證滅故究竟卽
證入義也學無學人昔住學地之稱謂研真斷惑
始學無學人故我見卽是身見謂妄計身中有我

爲主宰故有無卽是邊見。謂謬於五蘊身中執斷常故。等該餘見。乃至六十二種。如是諸見皆以我見爲本。自以爲離者。以隨順佛言。知苦斷集。斷至我執盡時。自覺諸見皆亡。遂執爲極故。小乘涅槃。以我空爲體。謂以爲得者。以隨順佛言。修道證滅。修至已證我空。不知權巧假立。便執爲真故。如是皆爲執權爲實。今聞正直捨方便等。故云所未聞也。皆墮疑惑者。若謂昔是。則疑今日誑妄。若謂今是。則惑昔日徒勞。又豈知今日之實。不離昔日之權哉。○善哉。下代爲啟請。美其權實雙行。望其不

惓慈悲。故稱善哉世尊。願爲四衆說者。無學尚迷。
餘衆可知。故法說章中。屢言惟一佛乘。無有餘乘。
且云正直捨方便。但說無上道等。如是廢棄權宗。
不無因緣。四衆不知。故有今昔相乖之疑。是非莫
辨之惑。於是身子代爲啟請。求說因緣。廢棄之因
緣若明。今昔之是非自辨。故云令離疑悔。準後如
來結答文云。以是因緣。當知諸佛方便力故。於一
佛乘。分別說三。頌云。以是因緣。十方諦求。更無餘
乘。除佛方便。皆應此也。身子代請竟。

二如來許說

爾時佛告舍利弗。我先不言諸佛世尊以種種因緣譬喻言詞方便說法。皆爲阿耨多羅三藐三菩提耶。○是諸所說皆爲化菩薩故。然舍利弗。今當復以譬喻更明此義。諸有智者。以譬喻得解。

初按定已說身子既有兼利之心。如來不避饒舌之嫌。故又告也。我先不言等。寓有斥問不當之意。意謂因緣譬喻等。方便說法。皆爲阿耨菩提。故知會權歸實。爲廢棄權宗因緣。我先不曾言過是語耶。何故復請說其因緣哉。○是諸下。牒法標喻。是諸所說。牒上因緣譬喻等。爲下巧設三車之旨。爲

化菩薩。牒上皆爲阿耨等。爲下等賜一車之旨。然字有三義。一轉語詞。謂轉變其文故。二慨歎聲。謂嗟其不悟故。三允諾意。謂允其所請故。再說不解。仍前無益。故云當以喻明。諸有句。有鼓舞勸勉意。意謂爾等果是有智之人。自當以喻得解。若仍有未解者。則是終於下流。吾未如之何也已矣。如來許說竟。

三正說譬喻二 一長行二偈頌 初三 一喻
說二法合三結答 初三 一喻衆生機感二喻
如來化應三喻佛語無虛 初三 一喻所感之

佛二喻能感之衆三喻結成感義

初

法說章云我以佛眼

觀此卽我字義也

舍利弗。若國邑聚落。有大長者。其年衰邁。財富無量。多有田宅。及諸僮僕。

若猶如也。國邑聚落。準合文當以一切世間配之。一切世間。於三種中指器世間。所謂三千大千世界是也。若別喻者。國喻大千。邑喻中千。聚落喻小千。從廣至狹。秩然可對。有字有係屬義。言長者係國邑聚落之主。喻如來爲一切世間之父故。長者喻佛。古德說有十義。今略爲三。二名盛。謂善順物

情聲譽隆彰。喻佛應機說法。名稱周徧故。二德隆。
年高行潔。衆所推尊。喻佛證極情亡。德冠九界故。
三大富。謂倉盈庫溢。給國不乏。喻佛智淨慧圓。出
生諸法故。其年衰邁者。衰則甘苦歷盡。離諸怖畏。
邁則理事練達。絕諸昏朦。喻佛斷德。五住究盡。二
死永亡。卽上所釋德隆義也。財富無量者。財如紫
標黃榜。富比銅嶺金谷。喻佛智德廣大深遠。無窮
無盡。卽上所釋大富義也。田宅僮僕者。田能滋命。
宅可棲身。僮備驅遣。僕候聽用。喻佛恩德滋養法
身。棲止慧命。驅慈與樂。用悲拔苦。卽上所釋名盛

義也。喻所感之佛竟。

二喻能感之衆

法說章云。見六道衆生。此卽衆生義也。

其家廣大。惟有一門。多諸人衆。一百二百。乃至五百人。止住其中。○堂閣朽故。墻壁隕落。柱根腐敗。梁棟傾危。周匝俱時。欻然火起。焚燒舍宅。長者諸子。若二十。或至三十。在此宅中。

初喻五道衆生。其家廣大者。五百止住。曰廣大。雖五百止住。而屬於長者。故曰其家。喻三界雖五道所居。亦佛化境也。惟有一門者。兩戶相合。曰門。喻善惡品中修斷二事。言欲出三界。惟修可得。惟斷

方能故。多諸人衆者。家大事煩。各有專司。喻五道衆生。酬債償冤。循業發現故。一百居初。喻天道。二百次之。喻人道。乃至者。超略三百四百。喻畜鬼二道。五百居末。喻獄道。五道之數。轉次轉增者。顯修善者少。作惡者多。所謂三惡道充滿。天人衆減少也。往復循環。不出三界。故喻云止住其中。○堂閣下。喻三乘衆生。正寢曰堂。覆屋曰閣。豎喻三界層數。四相三災。奄忽而至。故喻以朽故。朽故猶殘弊也。周垣曰牆。四圍曰壁。橫喻六道分齊。死此生彼。輪迴相逼。故喻以隕落。隕落猶墜墮也。柱喻別業。

根喻同業。依真忽起。妄動非真。故喻云腐敗。腐敗猶壞爛也。梁喻別報。棟喻同報。二業所感。妄見無實。故喻云傾危。傾危猶脫斜也。徧滿其中。曰周匝。無前無後。曰俱時。無而忽有。曰欻然。猛燄頓熾。曰火起。堂閣俱然。曰燒宅。今當逆次取喻。其義自明。言火起燒宅者。喻五濁八苦。逼迫三界。然此五濁八苦。本由惑業妄現。從畢竟無成。畢竟有。故喻以欻然。雖從畢竟無成。畢竟有。亦六道同時俱起。無空無隙。無前無後。故喻以周匝俱時。諸子總喻三乘。以大通威音。從佛結緣。有子義故。若十別喻菩

薩二十別喻緣覺三十別喻聲聞三乘之數轉上轉少者勝因難修故并與五道俱溺故喻云在此宅中喻能感之衆竟。

三喻結成感義

此卽正喻法說章中爲是衆生故而起大悲心兼喻以佛眼觀乃至

貧窮無福慧等義。

長者見是大火從四面起卽大驚怖而作是念我雖能於此所燒之門安隱得出而諸子等於火宅內樂著嬉戲不覺不知不驚不怖火來逼身苦痛切已心不厭患無求出意。

大火四起者謂四面周匝一時俱起喻五濁八苦

等。徧於四生及六道故。佛於法身理地。受熏垂照。故喻云長者見也。驚怖義通法喻。喻中謂驚子傷身。怖子失命。法中則驚怖三乘。傷法身。失慧命也。而作是念。喻佛興大悲。以作念意欲救火。興悲意欲拔苦故。所燒卽是火宅。仍喻三界之門卽是出路。仍喻修斷。安隱得出。喻離苦得樂。言佛與衆生同爲凡夫。同住三界。同受衆苦。惟佛於修斷事中。精勤不息。已能離生死苦。得涅槃樂。故喻以所燒之門。安隱得出。而字應上雖字。言父雖安隱得出。而諸子尚處宅內。喻佛雖離苦得樂。而三乘機性。

尚淪三界也。或墮落凡夫。耽荒五欲。或流入邪見。深着妄法。故喻以樂著嬉戲。不覺者。不覺宅中有火。不知者。不知火能焚燒。喻三乘淪於三界。不覺三界是苦。不知苦是逼迫性故。不驚者。不驚喪身。不怖者。不怖失命。喻衆生塵勞日侵。喪法身。失慧命。恬然無懼也。火來逼身。苦痛切已者。身喻法身。已喻慧命。總喻衆生一樂未遂。衆苦已至。逼迫法身。關切慧命。法說章中。所謂生死險道者。此耳。心不厭患。喻衆生不思離苦。無求出意。喻衆生不思得樂。不思離苦。則不知斷集。不思得樂。則不知修。

道所以修斷之門雖設。不惟不能出。亦復不能知。
言念及此。不得不出真而涉俗也。喻衆生機感竟。
二喻如來化應。二一喻從實施權。二喻會權歸
實。初二一喻從實不得。二喻隱實施權。初
二一喻三七思惟。二喻作念無計。初即前法
說章中。
我始坐道
場等義。

舍利弗。是長者作是思惟。我身手有力。當以衣祴。若
以几案。從舍出之。

作是思惟。準偈中已入火宅。喻如來現相人中。示
成正覺。欲稱本懷。擬用大法也。身喻神通。手喻智

慧神通有荷負之功。智慧有提拔之能。故喻云有力。衣祴几案。總喻佛地功德。佛地功德。無量無邊。略而言之。曰知見。曰十力。曰四無所畏。若別喻者。衣祴乃西域華器。能受衆華。喻知見能含衆妙。几香几也。置必居中。喻無畏能居正位。案書案也。用處廣博。喻十力功能無邊。從舍出之者。身有力則負以衣祴。手有力則提以几案。故能從舍出之。喻如來初成正覺。欲以神通力。智慧力。讚歎如來知見力。無所畏等。令衆生一生圓證。頓超三界也。

二喻作念無計

卽前法說章中。若但讚佛乘等義。

復更思惟。是舍惟有一門。而復狹小。諸子幼稚。未有所識。戀著戲處。或當墮落爲火所燒。

復更思惟者。知子幼稚。轉復作念。喻如來知諸根鈍。展轉思惟也。一門則別無出路。狹小則易於留礙。喻三界惟修斷可出。而修斷門中多阻滯故。稚小也。幼稚無識。則不知出路。戀著戲處。則不體父心。不體父心。故几案空提。衣裓虛負。雖身手有力。亦莫可奈何。故曰。或當墮落爲火所燒。喻衆生根鈍智劣。不知出要。戀著三界。不體佛心。不體佛心。故不能領受佛知見等。如來雖有神通智慧。亦莫

可奈何。或彼機猶未熟。仍當墮落三界。爲衆苦所迫。所以如來有寧不說法疾入涅槃之歎也。喻從實不得竟。

二喻隱實施權

卽前法說章中。尋念過去佛所行方便力等義。但法說惟約鹿苑。此

中義含三會。法說惟約聲聞五人。此中文具三乘諸機。法說惟言法輪總名。此中喻出四諦別相。此前後法喻詳略隱顯之不同。講者亦惟依喻立義。不必強爲牽引貼合。反令喻義不順也。分二

一喻先示苦集二喻次施道滅

初三

一喻尋

念方便二喻正示苦集三喻違情不信

初

我當爲說怖畏之事。此舍已燒。宜時疾出。無令爲火之所燒害。

我當者。擬度之詞。喻佛知根鈍。尋念方便之意。說怖畏事者。欲令速出。喻如來擬說苦諦。令斷集出界也。此舍已燒。正擬所說怖畏。喻苦諦當知。宜時疾出。正擬勸其速出。喻集諦當斷。以斷集方能出界。故宅不出。則定爲火害。故誠以無令。喻界不出。則衆苦難免。故勸以不可。此等俱係擬議語也。

二喻正示苦集

作是念已。如所思惟。具告諸子。汝等速出。

擬度已定。故云作是念已。喻如來施權意決也。如所思惟。具告諸子者。謂如上所擬說。此舍已燒。勸

宜時速出。誠無令火害等語。一一具悉。詳告諸子。
喻如來示苦令知。勸集當斷。誠以三界不可久居。
普告群機。同離同斷也。末復教以汝等速出者。正
長者反覆叮嚀。喻如來諄諄教誡之意。

三喻違情不信

父雖憐愍。善言誘諭。而諸子等。樂著嬉戲。不肯信受。
不驚不畏。了無出心。亦復不知何者是火。何者爲舍。
云何爲失。但東西走戲。視父而已。

反覆叮嚀。卽是憐念哀愍。說怖勸出。皆爲善言誘
諭。喻如來諄諄教誡。說苦說集也。父雖如是。而子

猶未信。喻如來雖示苦集。而衆生不受教也。樂著
嬉戲者。喻衆生耽荒五欲。染著邪見。著邪見故。不
知佛爲導師。荒五欲故。不知法能出離。故喻云不
肯信受。此卽所謂不求大勢佛。及與斷苦法也。不
驚者。不驚喪身。不畏者。不畏失命。喻衆生不怖傷
法身。不懼失慧命也。了無出心者。樂著嬉戲。全無
出宅之心。喻衆生耽欲著邪。不求出離。蓮師所謂
束手死門者是也。亦復不知。通貫下文。不知是火
者。謂火來逼身。不自覺知。喻衆生衆苦逼迫。不知
苦是逼迫之性。不知爲舍者。身住朽宅。不自觀察。

喻衆生久淪三界。不知界是無常之法。蓮師所謂如蠅蛆飫於廁中。類牛羊就乎屠肆者是也。不知爲失者。門外樂利。失而不顧。喻衆生但取界內無常之樂。不知界外真常之樂。因此永失。古德所謂捨却反魂香。反搗塗毒鼓者是也。隨善業以上升。喻如東馳。逐惡業而下墜。喻如西走。從流上下。還源無期。故喻云但也。亦知佛果可欣。其如自甘無分。故喻云視父而已。喻先示苦集竟。

二喻次施道滅三 一喻尋念方便二喻正施道滅三喻適願修證 初

爾時長者。卽作是念。此舍已爲大火所燒。我及諸子。若不時出。必爲所焚。我今當設方便。令諸子等得免斯害。

卽作是念者。由諸子不信父言。父念愈急。喻衆生不受佛化。佛悲愈切也。此舍已爲大火所燒者。言火起已久。喻無始已來。有此三界。卽有此衆苦所逼故。長者爲救子故。已入火宅。與子同住。故云我及諸子。喻如來爲度衆生。示生三界。凡聖同居也。若不時出。必爲所焚者。旣不能及時救子。同出火宅。又不忍捨彼獨出。必至與子俱焚。喻如來旣不

能速度昔緣。同出三界。又不忍捨化。雖丈六之身。亦未免爲四相所遷。淨名所謂因病而病者。亦此義也。當設方便者。擬設玩好之具。合其先心。喻如來擬用三乘滅諦。投其宿性故。令諸子等得免斯害者。由玩好合其先心。必當欣取。由欣取故。自能出宅免害。喻滅諦投其宿性。必當慕證。由慕證故。自能出界離苦也。道諦義含。以慕滅必修道故。此等亦係擬議語也。

二喻正施道滅

父知諸子。先心各有所好。種種珍玩奇異之物。情必

樂著而告之言。汝等所可玩好。希有難得。汝若不取。後必憂悔。如此種種羊車鹿車牛車。今在門外。可以遊戲。汝等於此火宅。宜速出來。隨汝所欲。皆當與汝。父知諸子者。喻如來鑒機不謬。先心所好者。喻衆生宿性所習。宿性所習。有聞緣菩薩之別。故喻云種種珍玩。以種種珍玩。暗指下之三車。應喻三乘也。三乘滅諦。俱非世間所有。故喻云奇異之物。情必樂著者。既係先心所好。雖一時忘懷。聞則愛生。喻衆生宿性所習。雖隔陰暫昏。觸則機動。故而告之言者。既知子已。隨情說與。喻如來既知機已。隨

宜施教也。所可玩好者。懸示門外。更有所可玩賞。所可好樂之物。喻如來懸示界外滅諦中。有真樂可取也。希有難得者。非宅中所有。非輕易可得。喻滅諦真樂。非界內所有。非造次可證故。汝若不取。後必憂悔者。勉其及時而取。勿致後來憂其不得。悔其取遲。喻如來勉以及時修證。勿致後來空無所獲。虛生浪死。徒增悲悼也。如此種種等。手指門外。示以三車。喻如來正示滅諦。若別喻者。羊車任輕致近。喻聲聞滅諦。惟求自利。急於取證故。鹿車任載微重。致道微遠。喻緣覺滅諦。少懷兼利。少欲

上達故。牛車任重致遠。喻菩薩滅諦。兩利爲心。果滿爲期。故可以遊戲者。可以乘遊。可以嬉戲。喻既證滅諦。自當六通縱任。自在無礙也。汝等於此火宅。宜速出來者。意明火宅不可久居。當速求出離。喻如來示以三界無安。當急修道諦。急修道諦。則界外滅諦。便可隨意取證。故喻云。隨汝所欲。皆當與汝。所謂但辦肯心。必不相賺也。然三乘俱約四諦釋者。以諦緣六度。名別義同。今觀前後經文。允合四諦。姑就文立義耳。又四諦有生滅。無生無量。無作等義。何機不攝。何教不收也。

三喻適願修證

爾時諸子聞父所說珍玩之物。適其願故。心各勇銳。互相推排。競共馳走。爭出火宅。

聞說適願者。合其先心。喻衆生聞說滅諦。投其宿性也。心各勇銳者。各各勇猛精銳。喻衆生各發勝心。精進不退也。互相推排者。彼此推逐排遣。喻三乘各執已見。互相是非也。競共馳走者。奪路驟馳奔走。喻三乘各遵己法。競共進取也。爭出火宅者。各欲早得自車。乘遊嬉戲。喻三乘各欲速證自果。受用自在也。若以位次釋者。聞說適願。喻發心位。

謂始從不覺。初發出界。取滅之心。猶適願故。心各勇銳。喻資糧位。以資糧位中。五停心。總相念。別相念。伏煩惱惑。未得卽除。如勇如銳故。互相推排。喻加行位。以加行位中。煖頂忍世第一。伏除分別煩惱。未得卽斷。如推如排故。競共馳走。喻通達位。以通達位中。須陀洹果。斷八十八使。分別見惑。未盡俱生。如馳如走故。爭出火宅。喻修習位。以修習位中。斯陀含果。斷欲界前六品。俱生思惑。阿那含果。斷欲界後三品。俱生思惑。更有上二界七十二品思惑。未得卽盡。如爭未出故。向下安隱得出。露地。

而坐。方喻無學。臨文再辯。此是聲聞位次。緣覺菩薩準知。若以四諦釋者。適願勇銳。喻慕滅。互相推排。喻斷集。競共馳走。喻修道。爭出火宅。喻離苦。若以三慧釋者。聞說珍玩。喻聞慧。心各勇銳。喻思慧。推排馳走。喻修慧。總言一音說法。隨類各解。配位約法對慧。由人取用而已。喻從實施權竟。

二喻會權歸實三 一喻時至機熟二喻等賜一

乘三喻聞法獲益

初即前法說章中。我見佛子等。志求佛道者。等義。

是時長者見諸子等。安隱得出。皆於四衢道中。露地而坐。無復障礙。其心泰然。歡喜踊躍。○時諸子等。各

白父言。父先所許玩好之具。羊車鹿車牛車。願時賜與。

初喻時節已至。安隱者。未爲火害。得出者。無恙而出。喻衆生未爲衆苦所羈。保善出界也。四方通途。曰四衢。尚在半路。曰道中。喻三乘爲四德之衢。但未究竟也。旣到空閑。曰露地。不求遠達。曰而坐。喻三乘已證分果。不復進求也。無復障礙者。欲至父所。亦可得去。無復有火宅之障。喻三乘欲證佛果。亦可得修。無復有三界之礙。故若依上科辯位次者。安隱得出等。義當無學。以無學位中。阿羅漢果。

斷我執分別俱生煩惱盡離三界繫如安隱得出。

證生空理住偏真涅槃如露地而坐故。

問前以三車喻滅諦。

今既未見得車應是未得滅諦。何得遽以露地喻涅槃耶。答佛以三車非有而假設。正喻三乘本無而權名。今諸子已出火宅得至露地則是已得三車。正喻三乘已出三界得證偏真則是已得涅槃。後云若全身命便爲泰然者自得之貌對前驚怖已得玩好之具是也。

而言前見四面火起懼子被焚故驚怖作念此見安隱得出露地而坐故泰然喜躍喻三乘已住權果昔善不失佛心稍慰法說章中所謂今我喜無畏者此也。○時諸下喻根機已熟各白父言者不知車是假設欲求必得喻三乘不知果是權立欲

求必證也。父先所許三車。喻從前所說三乘。願時
賜與者。為車出宅。不見三車之賜。故願時與。喻眾
生取果出界。忽聞權果非真。故求速說。如前代請
文云。是學無學人。亦各自以離我見。及有無見等。
謂得涅槃。而今於世尊前。聞所未聞。皆墮疑惑。善
哉世尊。願為四眾說其因緣等。即索車義也。問身
子代
請。應是最上一乘。何故復以三車為喻。答。身子代
請。原為中根。即就中根言之。以彼雖聞三乘。非真
不知。更求真實一乘。意中惟以從前三乘。求示真
實。亦如長者諸子。雖見三車。非有。不知更求大白
牛車。意中惟以先許三車。必求見
賜。故仍以三車為喻。當善思之。喻時至機熟竟。

二喻等賜一乘

即前法說章中。於諸菩
薩中。正直捨方便等義。分二 一

喻正賜一乘二喻廢立之由 初

舍利弗。爾時長者各賜諸子等一大車。其車高廣。衆寶莊校。○周匝欄楯。四面懸鈴。又於其上。張設幃蓋。亦以珍奇雜寶而嚴飾之。寶繩交絡。垂諸華纓。重敷婉筵。安置丹枕。○駕以白牛。膚色充潔。形體姝好。有大筋力。行步平正。其疾如風。又多僕從而侍衛之。

初喻一乘之體。爾時者。出宅索車之時。喻時至機熟時也。機熟故。會群機而普施圓音。故喻云各賜諸子。時至故。捨群詮而獨標一乘。故喻云等一大車。其車高廣者。高以豎論。喻一乘之體。位居象先。

廣以橫言。喻一乘之體。理含衆妙。衆寶莊校者。金銀等寶。莊校所成。喻一乘之體。乃如來無量功德之所成故。如歎德文云。佛曾親近百千萬億無數諸佛。盡行諸佛無量道法。勇猛精進。名稱普聞。成就甚深。未曾有法。是也。○周匝下。喻一乘之相。周匝欄楯。持內遮外。喻諸總持法門。持善不失。遮惡不起。四面懸鈴。隨風振響。喻四無礙辯才。隨機說法。曉悟群生。上張幃蓋者。幃爲周幔。喻四無所畏。能遮外難。蓋爲頂覆。喻十力功能。超出一切。亦以珍奇等。謂此幃蓋。皆以寶嚴。喻力無所畏。亦以

無量功德之所成就。寶繩交絡者。衆寶爲繩。交相
聯絡。喻四無量心。借彼成物。聯絡已德也。垂諸華
纓者。華纓四垂。見者喜悅。喻四攝法。攝授衆生。獲
益歡喜也。重敷婉筵者。婉美筵席。重重敷設。如繒
纈茵褥之類。喻諸禪定解脫三昧等。種種具足。受
用無盡也。安置丹枕者。枕具兩頭。首枕其中。喻中
道兼於二諦。然此三諦。不離一乘之體。故喻云安
置。安置謂陳放車內也。○駕以下。喻一乘之用。一
乘之用。有教有理有行。初二句。喻一乘之教。駕以
白牛者。車以牛駕。喻體以教顯。牛以白名。喻文字

性空也。膚色充潔者。膚腠充滿。喻無善不備。顏色
淨潔。喻無惡不盡也。形體二句。喻一乘之理。一乘
之理。總觀別觀。無非至精至善。故喻云形體姝好。
謂衆形姝美。全體妙好也。有大筋力者。可以任重。
可以致遠。喻依理起行。可以普度衆生。可以直趣
菩提也。行步四句。喻一乘之行。一乘之行。不入險
邪。故喻云行步平正。十信滿心。攝位證覺。故喻云
其疾如風。此自利行也。慈悲雙運。與拔俱行。故喻
云又多僕從。借彼成物。以嚴已德。故喻云而侍衛
之。此化他行也。喻正賜一乘竟。

二喻廢立之由

所以者何。是大長者。財富無量。種種諸藏。悉皆充溢。而作是念。我財物無極。不應以下劣小車。與諸子等。○今此幼童。皆是吾子。愛無偏黨。我有如是七寶大車。其數無量。應當等心。各各與之。不宜差別。所以者何。以我此物。周給一國。猶尚不匱。何況諸子。

初喻廢權之由。所以句。總徵二由。是大下。且釋廢義。財富無量者。家財富足。無能測量。喻如來知見廣大深遠也。種種諸藏者。衆寶庫藏。喻無量無礙。力無所畏等。差別功德也。悉皆充溢者。充滿於中。

流溢於外。喻諸差別功德。體備於己。用現於外也。而作是念者。擬欲捨三與一。喻如來於法華會上。擬欲廢權從實也。財物無極者。自己之受用無盡也。既自己之受用無盡。應與諸子同享。故不應以下劣小車與諸子等。喻如來自證已圓。應令衆生同得。不當以權宗分果。竟許三乘。法說章云。自證無上道。大乘平等法。若以小乘化。乃至於一人。我則墮慳貪。此事爲不可。卽此義耳。○今此下。喻立實之由。幼童者。幼稚無識也。雖幼稚無識。在長者觀之。均屬親生。故云皆是吾子。喻三乘雖智慧狹。

劣。以如來觀之。同爲昔緣。俱有大機也。愛無偏黨者。旣均屬親生。而愛念之心。固應無偏無黨。喻三乘旣有大機。而如來慈悲平等。固應無遮無限也。七寶大車。乃長者平日所造。故云我有。喻一乘果體。乃如來多劫修成。此世現證。其數無量者。依車造車。轉轉滋多。喻如來以果印果。繩繩無盡。應當等心者。皆是子故。喻如來憶念昔緣。等心相濟也。各各與之者。愛無偏故。喻如來慈悲無遮。各記成佛也。不宜差別者。有寶車故。喻如來自證佛果。不應以餘乘教人也。所以句。轉徵不恪。所以言財。雖

無量應有盡時。所以等賜無恪者。何也。喻不知佛者。妄謂佛法有盡。謬起問難。不宜逢人便說佛法也。以我等正釋無恪之義。周徧也。給與也。置竭也。徧與一國。尚不能竭。何況諸子。豈足以竭父之財。喻如來以此佛法。普施法界衆生。猶不能盡。何況三乘。豈足以盡佛之法乎。所以如來等賜一乘而無恪也。喻等賜一乘竟。

三喻聞法獲益

此喻法說章中。菩薩聞是法。疑網皆已除等義。

是時諸子。各乘大車。得未曾有。非本所望。

是時者。喻等賜一乘之時。各乘大車者。喻三乘人。

等俱解安住實相。得未曾有者。喻權宗之流。至此成佛有分。非本所望者。喻本不求佛。所得過於所期。喻文可了。喻如來化應竟。

三喻佛語無虛

即前法說章讚法勸信中。佛語無虛義也。

分三 一如

來就喻垂問。二身子依問直答。三如來讚善印許。初

舍利弗。於汝意云何。是長者等與諸子珍寶大車。寧有虛妄不。

於汝句。借意徵起。是長下。牒喻致問。以如來許三與一。自說無妄為難。故假身子之意徵起。復牒喻

中之事致問。蓋爲借彼口中言。明此心腹事也。

二身子依問直答二 一總答二別明 初

舍利弗言。不也。世尊。

大成云。凡稱虛妄者。以無益而有損也。今雖許三
賜一。有益無損。故直以不也答之。然既知長者無
虛妄之咎。自信如來非欺誑之語。幸勿謂三既假
立。一亦非真。自斷佛種。障他勝進。

二別明二 一喻許三無虛二喻與一無虛 初
是長者。但令諸子得免火難。全其軀命。非爲虛妄。○
何以故。若全身命。便爲已得玩好之具。○况復方便

於彼火宅而拔濟之。

初舉例。但令免火者。謂長者許車之後。但以身手遮護。令其暫免火害。喻如來施權之後。但以神通智慧。加被覆護。令其暫脫衆苦。暫脫衆苦。則法身慧命。略可少延。故喻云。全其軀命。謂既免火害。則身軀性命。便能保全也。既能保全。諸子身軀性命。卽不救出火宅。亦非有妄。喻如來既能少延衆生。法身慧命。卽不度出三界。豈復爲虛。○何以下徵釋。保全身命。便爲已得玩好者。以身命爲衆物之主。主在卽是物在。喻法身慧命爲衆果之本。本固

卽是果存。○況復下。况顯承上。但令免火等。尚非虛妄。况復以彼許車方便。於火宅中而拔濟之。豈猶妄乎。喻如來但令脫苦。已不虛妄。况復以彼施權方便。救度令出三界。又誰能以虛妄議之。是知從前雖許三乘。固無妄也。

二喻與一無虛

世尊若是長者。乃至不與最小一車。猶不虛妄。○何以故。是長者先作是意。我以方便。令子得出。以是因緣。無虛妄也。○何況長者。自知財富無量。欲饒益諸子。等與大車。

初舉例。最小之車者。兒戲犬豕等車。喻人天有漏之乘。較三乘猶劣。故喻中謂諸子既出火宅。不但不與三車。乃至最小之車。亦不與之。猶非虛妄。喻衆生既出三界。不但不許住於三乘。乃至人天之乘。亦不許住。仍無虛妄。○何以下徵釋。先作是意。方便令出者。謂長者雖許三車。先意原是方便。但爲令子得出。非謂實與。喻如來雖說三乘。初心本爲權巧。但令衆生得出三界。非教實住權宗也。以是因緣。無虛妄者。先意非真。故子今已出。故喻如來初說權宗。本非令住。而又能令衆生出離三界。

故雖不與人天之乘。猶不妄也。○何況下。况顯承。上不與最小之車。猶不虛妄。何況以已所有。等以大車而饒益之。寧有虛妄乎。喻如來不與人天之乘。已非是虛。何況以自所證。等以一乘而授與之。又孰從而議其有虛妄之咎哉。是知今日等賜一乘。更無妄也。身子依問直答竟。

三如來讚善印許

佛告舍利弗。善哉善哉。如汝所言。

重言善哉者。有二義。一讚嘆義。謂讚其於喻既明。於法自信故。二慶幸義。謂慶其既知長者之心。必

知如來之意故。如汝所言者。印定之詞。設如來自說無妄。或生疑議。今假身子說出。一言印定。而時衆自無詞也。喻說竟。

二法合三 一衆生機感二如來化應三佛語無虛 初三 一所感之佛二能感之衆三結成感義 初

舍利弗。如來亦復如是。則爲一切世間之父。於諸怖畏。衰惱憂患。無明闇蔽。永盡無餘。而悉成就無量知見。力無所畏。有大神力。及智慧力。具足方便智慧波羅密。大慈大悲。常無懈怠。

如來句。寄言總合。謂如來許三與一。無有虛妄。亦復如彼長者是也。則爲下。依次別合。一切世間。合前國邑聚落。義見喻中。父非是喻。卽佛之美稱。以佛視世如子。故稱世父。合長者視國等如子。故稱國邑聚落。有大長者也。怖畏卽二種生死。二種生死。無始輪轉。可怖可畏故。衰惱憂患。卽老病二苦。老則日近衰微。施爲反初故惱。病則眠卧床枕。久憂弗瘥故患。此生死兩楹之相。亦生死攝。無明者。界外別惑。心不明淨爲性。轉變種種惡法爲業。亦云無明住地。闇蔽者。界內通惑。謂見與思也。昏闇

障蔽爲性。成造有漏因果爲業。義攝四住煩惱。如上二死五住。究竟寂滅。故云永盡無餘。此明斷德。合前其年衰邁義也。無量知見等。謂實智體相。一圓滿。故云而悉成就。神力智慧者。謂實智力用。體相旣備。而力用自彰。故名爲有。此明智德。合前財富無量義也。方便智慧者。謂權智體相。體相差別。佛悉究竟。故以波羅密稱之。大慈大悲者。謂權智力用。力用度生。經劫忘疲。故以無懈倦稱之。此明恩德。合前田宅僮僕義也。所感之佛竟。

二能感之衆

恒求善事。利益一切。而生三界朽故火宅。爲度衆生。生老病死。憂悲苦惱。愚癡闇蔽。三毒之火。教化令得。阿耨多羅三藐三菩提。

恒求善事。利益一切者。謂如來於無量劫來。恒求修善斷惡之事。利益一切衆生。俾離苦而得樂也。準梵網。來此世界八千返。故云而生三界。朽故火宅者。法中帶喻。令知三界無常。敗壞不安。猶如火宅。急生厭離。故衆生者。準下令得菩提。應指往昔結緣之機。言如來出世。雖利益一切。而重在有緣。故云爲度。憂悲苦惱者。卽生老病死之相。對論則

生處胎獄故苦。老厭龍鍾故惱。病患床枕故憂。死傷別離故悲。此明苦諦。愚癡卽是無明。由無妙覺之明。故稱愚癡。闇蔽同前。三毒者。貪瞋癡也。爲煩惱本。故別舉之。此明集諦。苦集二諦。俱名爲火者。苦集相因。如薪火相然。同爲燒性故。令得菩提者。爲結大通威音之案。并完出世度生之懷也。若合前喻者。恒求則常住世間。合其家廣大。善事謂修善斷惡。合惟有一門。一切則總該五道。合五百人。衆生指結緣之機。合三十子。喻中更有堂閣朽故。乃至欬然火起等文。總以三界朽故火宅合之。此

中爲度令得等文。喻義不具。蓋爲顯示衆生屬於
昔緣。帶言之耳。能感之衆竟。

三結成感義

見諸衆生。爲生老病死。憂悲苦惱之所燒煮。亦以五
欲財利故。受種種苦。又以貪著追求故。現受衆苦。後
受地獄畜生餓鬼之苦。若生天上。及在人間。貧窮困
苦。愛別離苦。怨憎會苦。如是等種種諸苦。衆生沒在
其中。歡喜遊戲。不覺不知。不驚不怖。亦不生厭。不求
解脫。於此三界火宅。東西馳走。雖遭大苦。不以爲患。
見諸衆生者。約此番示降之前。理地觀機也。所觀

之機。略具三苦。詳備八苦。略具三苦者。一後報苦。如生老病死。憂悲苦惱。乃前世業因所成。今受燒煮。故屬後報。二現報苦。以五欲財利。受種種苦者。或因色而損精。或緣聲而耗神。或貪香而受毒。或着味而傷身。或由觸而壞形。或爲毫髮之財。卧雪眠霜。或爲蠅頭之利。披星帶月。甚至忍饑衝寒。喪身失命者。比比皆是。貪著者。於現在境。貪染愛著。追求者。於過未境。追逐營求。如此則未得患得。終日營營。旣得患失。無所不至。故云現受衆苦。此上皆以現生作業。現生卽受。故屬現報。三生報苦。後

受者由上貪著追求業因已成華報不足以償後受果報也。地獄有八寒八熱等苦。餓鬼有針咽炬口等苦。畜生有啣鐵負鞍等苦。此約惡業重者而言。如或惡業稍輕而善業微重者。則若生天上。如或善惡均等而不升不墜者。則及在人間。人間衆苦類有多種。貧窮困苦者。食不充口。衣不蔽形等。此由不知布施慳貪嫉妬等所致。愛別離苦者。生離妻子。死別父母等。此由破他親眷間彼恩義等所致。怨憎會苦者。讐敵難解。怨對莫避等。此由劫他財物傷彼生命等所致。若約天上而論。有漏之

福不比無漏。貧窮困也。報盡時至。五衰相現。愛別離也。修羅爭權。累戰不釋。怨憎會也。此上皆是今生作業。來生方受。故屬生報。詳備八苦者。五道衆生。莫不有身。卽是五陰熾苦。貧窮所迫。五欲財利所牽。貪著追求等。有願不遂。卽是求不得苦。合前生老病死。并後怨會愛別。共爲八種。此合前喻。長者見是大火。從四面起也。如是者。總結之詞。略具三苦。詳備八苦。微細分之。品類實繁。故云種種諸苦。諸苦無涯。猶如大海。隨業升沉。不能自出。故云沒在其中。執苦爲樂。流蕩忘返。故云歡喜遊戲不

覺二句。準喻可知。不思斷集離苦。故曰亦不生厭。
不思修道證滅。故曰不求解脫。何以見其亦不生
厭。不求解脫也。但見其於三界火宅。隨善業以東
馳。隨惡業以西走。雖遭大苦。不以爲患。豈知心生
厭離。而更求解脫法哉。此合前喻。卽大驚怖。而作
是念。乃至心不厭患。無求出意等也。衆生機感。竟
二如來化應。分二。一從實施權。二會權歸實。
初二。一從實不得。二隱實施權。初二。一三
七思。惟二作念。無計。初。
舍利弗。佛見此已。便作是念。我爲衆生之父。應拔其

法華指掌疏
苦難與無量無邊佛智慧樂令其遊戲。

佛見此已者。理地觀機已竟也。便作是念。指道後思惟如是。則便之一字。不合緊接上句。蓋譯者略失意耳。若以義會通。應云。示生成道。始坐道場時。便作是念。此卽法說章。三七日中。思惟是事也。我爲衆父等。有慨然自任之意。所謂以斯道覺斯民。非予覺之而誰與。拔苦者。頓拔二死之苦。與樂者。圓與衆智之樂。得衆智樂故。優遊於四德之場。離二死苦故。永別乎三界之區。故云。令其遊戲。此如來雖知根鈍。擬稱本懷意也。若合前喻者。旣爲衆

父必具神通智慧。合身手有力。拔苦與樂。必以知見功德。合衣被几案。令其遊戲。永離三界火宅。合從舍出之。皆以文外之義。合者。以經家意到文不到耳。

二作念無計

舍利弗。如來復作是念。若我但以神力及智慧力。捨於方便。爲諸衆生。讚如來知見力。無所畏者。衆生不能以是得度。所以者何。是諸衆生。未免生老病死。憂悲苦惱。而爲三界火宅所燒。何由能解佛之智慧。

拔苦與樂。雖父道所當盡。然轉更思惟。終難從實。

故云復作是念。前科但云。我爲衆生之父。不云具何功能。此科乃云。若我但以神力。及智慧力。又前科但云。應拔其苦難。與無量無邊佛智慧樂。不云說何法門。此科乃云。捨於方便。讚如來知見等。蓋義之隱於彼者。顯於此。而解者。不能細尋隱覆之義。妄以後法合於前喻。以致法喻不齊。猶如海水潛流。彼沒此出。不知者。謂爲彼地無水。以致越境尋河。徒費曲折。良可愍歎。不能以是得度者。謂不能領受大法。尚應淪溺。故不得度。此合前喻。或當墮落。爲火所燒。義也。所以下。乃徵釋。不能得度所

以未免生老病死等苦者。由於修斷多誤。合前一
門狹小。而爲三界火宅所燒者。由於耽欲著邪。合
前戀著戲處。具此二義。是乃根鈍智劣。何由能解
佛智。合前幼稚無識。佛智既不能解。云何得度。所
以如來展轉思惟。雖有神通智慧之力。亦無如之
何矣。從實不得竟。

二隱實施權二 一提喻貼合二正明施權 初

舍利弗。如彼長者。雖復身手有力。而不用之。但以殷
勤方便。勉濟諸子火宅之難。然後各與珍寶大車。○
如來亦復如是。雖有力無所畏。而不用之。但以智慧

方便於三界火宅。拔濟衆生。爲說三乘。聲聞辟支佛。佛乘。

初總提前喻

謂總提前來隱實施權。會權歸實之喻也。

承上衆生不能

以大法得度。如來當如之何。故總提前喻以告之。

如彼長者等。先提隱實施權之喻。殷勤者。諄諄懇

切。勉濟者。勸勉救濟。餘可知。然後各與等。次提會

權歸實之喻。非本科正喻。乃帶言耳。○如來下。別

以貼合。

謂別合上來隱實施權之喻也。

如來隱神智而施權乘。宛

同長者停身手而用方便。故云亦復如是。雖有句

貼合隱實之喻。但以等貼合施權之喻。佛乘卽大

乘也。在因名菩薩乘。在果名佛乘。雖名佛乘。但是權漸。非圓頓最上一佛乘也。

二正明施權二。一先示苦集二次施道滅。初

喻有三科
惟合正示

而作是言。汝等莫得樂住三界火宅。勿貪麤弊色聲香味觸也。若貪著生愛。則爲所燒。

而作是言者。統收三乘作四諦說也。三界無安。猶如火宅。故教以莫得樂住。此示苦當知也。麤弊者。是有爲。非無爲。是無常。非真常。麤而非妙。弊而非堅。故古德云。色如熱金丸。執之則燒。聲如塗毒鼓。

聞之則死。香如慙龍氣。嗅之則病。味如沸蜜湯。舐之則爛。觸如卧獅子。近之則嚙。又前云。以五欲財利故。受種種苦。故云貪著生愛。則爲所燒。此示集當斷也。若論集諦。攝法尚多。惟貪爲首。故獨戒之。若合前喻者。莫得樂住三界。合前具告諸子中。此舍已燒之義。勿貪麤弊五欲。合前具告諸子中。宜時疾出。無令火害之義。

二次施道滅喻亦三科分二 一正施道滅二適

願修證 初

汝速出三界。當得三乘。聲聞辟支佛。佛乘。我今爲汝

保任此事終不虛也。汝等但當勤修精進。如來以是方便誘進衆生。復作是言。汝等當知此三乘法。皆是聖所稱歎。自在無繫。無所依求。乘是三乘。以無漏根力覺道。禪定解脫三昧等。而自娛樂。便得無量安隱快樂。

素無遠大之志。如來鑑知。故教以速出三界。宿具權小之習。性欲猶在。故示以當得三乘。三乘滅諦。必出界乃當得者。顯是界外之果。此合前喻。父知諸子先心所好。示以羊車鹿車牛車。今在門外等義。保任猶承管也。既示滅諦。恐生畏難之心。故許

爲保任。但辦肯心。再無不得之理。故示以不虛。此合前喻。隨意所欲。皆當與汝之義。勤修者。勤修道品。精進者。精進不輟。如此乃能出界證滅。故教以汝等但當等。此合前喻。汝等於此火宅。宜速出來之義。又汝等但當勤修精進者。教以只管修習。勿憂弗得。亦先難後獲義也。如上道滅二諦。本爲群機假設。故云以是方便。誘進衆生。復作是言者。稱歎果德。令發出界取滅心也。汝等下。正所作稱歎之言。教以當知者。恐生輕易想故。三乘之法。雖未卽至寶所。亦可暫息疲勞。方便利生。法爾如是。故

爲聖所稱歎自在無繫者。心得自在。絕諸有繫。所謂能離生死是也。無所依求者。無有餘依。不復進求。所謂究竟涅槃是也。此合前喻。汝等所可玩好。希有難得之義。親證滅諦。名爲乘。是三乘。上乘字。卽登御義也。根力覺道禪定解脫三昧者。謂五根。五力。七覺支。八正道。四禪。九定。八解脫。三三昧門。如此皆以無漏稱者。謂依此修習。能超諸漏。從功能爲名也。而自娛樂者。約隨分利益言之。謂修一道品。卽得一種娛樂。道非他修。樂亦自受。故便得無量等。約究竟利益言之。謂三乘果中。更有無量。

安隱快樂。如果精修道品。即便能得故。是可見既得是乘。二利皆爲己樂。不得是乘。兩失又復誰傷。此合前喻。可以遊戲。及汝若不取。後必憂悔等義。然此一科。與喻文前後交絡。上下顛倒。乍觀似異。細尋實同。惟以義合。不必膠柱。正施道滅竟。

二適願修證

前文三乘總喻。此中別合。

分三

一聲聞修證二

辟支修證三菩薩修證

初

舍利弗。若有衆生。內有智性。從佛世尊。聞法信受。殷勤精進。欲速出三界。自求涅槃。是名聲聞乘。如彼諸子。爲求羊車。出於火宅。

宿修生空智品。納習在心。故云內有智性。從佛聞法者。從小教佛。聞生空法。空法投其宿習。故能信受。此合前喻。適願勇銳之義。殷勤精進者。殷勤修道。精進不退。此合前喻。推排馳走之義。欲速出界者。急欲出離。自求涅槃者。不思援他。大成云。欲速則不達。自求則不大。此合前喻。爭出火宅之義。末與結合。言既欲速自求。縱得出界。證滅不能遠大。故曰是名聲聞乘。衆生求此。如彼長者諸子。爲求羊車出宅者。無異。下二科合喻準此。

二辟支修證

辟支。具云辟支迦羅。此翻緣覺。亦翻獨覺。緣覺出有佛世。依佛因緣。覺真。

諦理獨覺出無佛世。深山邃谷。無師自悟。又無佛之世。亦有緣覺。如雖不值佛。常依佛教者是。有佛之世。亦有獨覺。如雖值佛世。不常近佛者是。今雖時當有佛。亦二類俱該。至下釋文自見。

若有衆生。從佛世尊。聞法信受。殷勤精進。求自然慧。樂獨善寂。深知諸法因緣。是名辟支佛乘。如彼諸子。爲求鹿車。出於火宅。

不言內有智性者。準上可知。故下倣此。從佛聞法。同上。以聲聞辟支。教理無異。故殷勤精進者。殷勤觀緣。精進不退。求自然慧者。從他悟少。自推義多。此總兼二類言之。樂獨善寂句。別指獨覺。以彼嗜絕人境。喜處深邃。故以樂獨稱之。寂而稱善者。寂

中時窮物理。非徒寂也。深知諸法句。別指緣覺。諸法卽十二有支。展轉生起。互相由藉。故以因緣稱之。知而言深者。順觀逆觀。知生起因。及無生理也。未與結合。言旣求自然慧樂。獨知緣。縱超過聲聞而未及菩薩。故曰是名辟支佛乘。衆生求此。如彼長者諸子。爲求鹿車出宅者無異。

三菩薩修證

若有衆生。從佛世尊。聞法信受。勤修精進。求一切智。佛智。自然智。無師智。如來知見。力無所畏。愍念安樂。無量衆生。利益天人。度脫一切。是名大乘。菩薩求此。

乘故。名爲摩訶薩。如彼諸子。爲求牛車。出於火宅。

從佛聞法者。從始終二教。佛聞法空藏心法。勤修者。勤修六度。精進者。經劫忘疲。此通約上求下化。言之。求一切智等。別明上求佛道。一切智。卽大圓鏡智。轉第八識相應心品而成。如大圓鏡。一切明了。故以一切爲名。佛智。卽平等性智。轉第七識相應心品而成。觀一切法。與諸衆生。皆悉平等。與佛無異。故以佛智爲名。自然智。卽妙觀察智。轉第六識相應心品而成。善能觀察諸法次第。復知衆生根性淺深。任運而說。自然而應。故以自然爲名。無

師智卽成所作智。轉前五識相應心品而成。成本願力。所應作事。應變無方。不拘成範。故以無師爲名。具上四智。名爲如來知見。亦卽清淨法界根本智也。五智圓滿。能知是處非處等。則成十力。能說自他智斷。則成四無所畏。愍念安樂等。別明下化有情。愍念者。憐其久苦。大悲義也。安樂者。授以勝善。大慈義也。五道衆生。莫不爲慈悲所覆。故云無量利益天人。度脫一切者。正明愍念安樂之義。人天已生善道。故須更增利益。此安樂衆生義也。一切尚淪惡趣。故惟度令脫苦。此愍念衆生義也。是

名下結合。言既上求下化。二利具足。則跨越小乘。
揀異聞緣。故曰是名大乘。菩薩求此名爲摩訶薩。
以是具大道心之衆生故。以喻言之。如彼長者諸
子爲求牛車出宅者無異。又大乘者。準提喻中云
佛乘。約所求滿果而言。或有云菩薩乘者。約現住
分果而論。分果固非究竟。滿果亦屬權漸。圓頓教
中。二俱不立。故向下俱廢。從實施權竟。

二會權歸實二 一重提前喻二以法帖合 初
舍利弗。如彼長者見諸子等。安隱得出火宅。到無畏
處。自惟財富無量。等以大車而賜諸子。

初提時至機熟喻。自惟下提等賜一乘喻。準前更有聞法獲益之喻。後無合文。故不重提。

二以法帖合二。一時至機熟二等賜一乘。初

文缺後義。科準喻文。以時既至。機必熟故。

如來亦復如是。爲一切衆生之父。若見無量億千衆生。以佛教門。出三界苦。怖畏險道。得涅槃樂。

初寄言總合。爲一下。本科正義。一期所化。難以枚舉。故云無量億千。佛說修善斷惡之教。卽衆生離苦得樂之門。故曰以佛教門。出三界苦等。三界衆苦所逼。動傷法身。輒喪慧命。故云怖畏險道。三乘

雖屬權果。已盡諸結。已滅生死。故云得涅槃樂。此

合前喻。是時長者見諸子等。乃至露地而坐等義。

二等賜一乘

與喻文前後交互。科隨義便。不必拘泥。

分二 一廢立

之由二正賜一乘 初

如來爾時便作是念。我有無量無邊智慧力。無畏等諸佛法藏。是諸衆生皆是我子。○等與大乘。不令有人獨得滅度。皆以如來滅度而滅度之。

初雙出二由。便作是念者。欲會一乘。以完出世之懷也。我有者。約自證而言。自證功德甚深廣大。故云無量無邊。略而言之。曰智慧。曰十力。曰四無所

畏等該餘德各能含攝出生無盡佛法故云諸佛法藏此合前喻長者財富無量諸藏充溢等義是諸衆生皆是我子者現根雖異昔緣無別此合前喻今此幼童皆是吾子等義○等與下雙結二由正以如來自證法藏無量無邊故等與大乘既等與大乘則不立權果此結廢權之由合前不應以下劣小車與諸子等義也又以是諸衆生皆是佛子故不令獨得言向來惟許菩薩獨得佛滅今則不爾故曰不令又向來不許二乘同得滅度今則不爾故曰皆以言如來滅度者卽佛果無住涅槃

以此滅五住惑。度二死苦。故云而滅度之。此結立實之由。合前應當等心。各各與之。不宜差別義也。

二正賜一乘

喻中先體次相後用。此中先相次體後用。義同而次第不同也。

是諸衆生脫三界者。悉與諸佛禪定解脫等娛樂之具。皆是一相一種。聖所稱歎。能生淨妙第一之樂。

初一乘之相。三乘衆生同離分段。故稱脫三界者。諸佛禪定等。不止四禪九定八解。應兼妙奢摩他。三摩禪那。不可思議解脫境界。約義合前。重敷婉筵之喻。文中等字。等餘不盡功德。約義合前。周匝欄楯等喻。此等皆爲佛地受用。故云娛樂具也。皆

是下一乘之體。言如上差別功德。約理不出一乘。實相。約智不出一切種智。故云皆是一相一種。據此則一乘實相。具無量相。一切種智。具無量種。約義合前。其車高廣之喻。聖所稱歎者。以是無量功德之所成故。如云。佛曾親近諸佛。盡行道法等。卽聖所稱歎之語。約義合前。衆寶莊校之喻。能生句一乘之用。淨脫業繫。卽解脫德。妙覺諸法。卽般若德。第一證窮。卽法身德。能生此樂者。須依教解理。緣理起行。約義合前。駕以白牛。乃至又多僕從等喻。如來化應竟。

三佛語無虛二 一重提前喻二以法貼合 初
舍利弗。如彼長者。初以三車誘引諸子。然後但與大
車。寶物莊嚴。安隱第一。然彼長者。無虛妄之咎。

初提許三與一喻。安隱第一。喻最上一乘。離二死
苦。生三德樂。爲安隱中最故。末句提二皆無虛喻。
二以法貼合

如來亦復如是。無有虛妄。○初說三乘。引導衆生。然
後但以大乘而度脫之。○何以故。如來有無量智慧
力。無所畏。諸法之藏。能與一切衆生。大乘之法。但不
盡能受。

初總合喻中已明不須借口。故直言無有虛妄。○
初說下別合。初說三乘原爲引導衆生。故雖不與
無有虛妄。此合許三不虛喻也。不說一乘原爲待
時。時至機熟。然後但以大度。故雖今與亦無虛妄。
此合與一不虛喻也。○何以下轉釋。初徵起者。欲
明先以三引。後以大度所以也。如來下先釋後義。
正以如來有無量法藏。能與大乘。所以後以大度。
末句次釋前義。正以不盡能受。所以先以三引。由
此觀之。益見如來之無虛妄矣。法合竟。

三結答

舍利弗。以是因緣。當知諸佛方便力故。於一佛乘。分別說三。

此科乃通承上文。以結答前請。如來意謂。汝先代衆啟請。求說廢棄權宗因緣。如我上說。初設三乘。原爲後來會歸一乘。以是因緣。當知汝等從前所證。乃諸佛方便權巧。於一說三。非究竟法。執權爲實者。亦可以知所悟矣。長行竟。

二偈頌

標頌云

佛欲重宣此義。而說偈言。

正頌分三

一正頌長行二極顯悲心三結囑珍重
初三

一頌喻說二頌法合三頌結答 初二 一頌衆

生機感喻二頌如來化應喻 初三 一頌所感

之佛喻二頌能感之衆喻三頌結成感義喻 初

略頌

譬如長者

準長行有依報德業。今以正攝依以人攝德。喻如
來舉其名兮。兼衆德而俱備也。

二頌能感之衆喻

約義廣頌

分四

一喻三界依報二

喻三界正報三喻三界衆苦四喻逼迫之相 初

準長行。依報凡二處。一曰其家廣大。二曰堂閣朽
故。乃至梁棟傾危。今合頌之。末後長出泥塗陀落

等喻。既與長行無的對之文。
故科中不言頌也。下皆倣此。

有一大宅。其宅久故。而復頓弊。堂舍高危。柱根摧朽。
梁棟傾斜。基陛隕毀。墻壁圯圻。泥塗隤落。覆苫亂墜。
椽栳差脫。周障曲屈。雜穢充徧。

有一大宅。喻如來三界爲家。頌前其家廣大。略惟
有一門。久故者。久遠故舊。喻無始時來。有此無明。
卽有此世界。法爾不牢。非暫時不安也。頓弊者。頓
遭震動。一時破弊。喻三毒招感。三災欲起。不久蕩
謝故堂舍。卽前堂閣。豎喻三界層數。高危者。高聳
危大。易於傾圯。喻三界爲四住所積。易於遷變故。

柱根梁棟同前摧朽傾斜者。仍前腐敗傾危之義。基者牆之址。陞者階之級。以此執持宅舍。妄計不壞。喻分別俱生二種法執。執著三界。妄計實有故。雖執著妄計。其本體亦未免爲四相所遷。故以隤毀喻之。隤毀猶敗壞也。牆壁同前圯圻者。隤裂義。泥塗所以飾縫隙。覆苫所以蔽風雨。椽栳所以持覆苫。此卽向下蟲棲鳥宿之處。喻鈍使衆生所依。依報以彼惡業殊勝。依報易壞。故以隤落亂墜等喻之。隤落謂隤敗零落。亂墜謂歷亂凋墜。差脫謂參差脫謝也。四維籬籬曰周障。紆迴難明曰曲屈。

此卽向下鬼潛怪藏之處。喻利使衆生所依依報。以彼邪法陷人。易入難出。故以周障曲屈等喻之。屎尿不淨。曰雜穢。彌綸無遺。曰充徧。喻彼邪見衆生。宣淫道妄。敗常亂倫。在在皆是也。

二喻三界正報。準長行。正報亦二。一曰五百人。二曰三十子。今缺三十子。補出鷗梟鷗鷺等喻。分二。一總喻五道。二別喻利鈍。初

有五百人止住其中。

義準長行。三乘雖具昔緣。此時尚淪五道。故不別開三十子喻。

二別喻利鈍三。一別喻五鈍。二別喻五利。三總

結二喻

初五鈍者。謂貪瞋癡慢疑也。於所緣境。初頭器不決。如彼鳥獸無知。故以爲喻。

分五 一喻慢使二喻瞋使三喻疑使四喻癡使

五喻貪使

初慢者。恃已於他。高舉爲性。能障不慢。生苦爲業。

鴟梟鵩鷲。烏鵲鳩鵲。

慢有七種。一但慢。謂於劣己法中。執己爲勝。二過慢。謂於同己法中。執己爲勝。三慢過慢。謂於勝己法中。反執己勝。四我慢。謂但知有我。不知有人。五增上慢。謂未得謂得。未證謂證。六卑劣慢。謂卑劣自守。反傲他能。七邪慢。謂執著邪見。不敬有德。今此中鴟鳥。亦名鵩鵲。乘隙入他巢。攫鳥子而食。以

大凌小。卽喻但慢。梟鳥亦名流離。俗呼夜貓。孚成反食其母。以小凌大。喻慢過慢。鵬鷺鷺鳥也。自恃形力。執取餘鳥爲食。卽喻我慢。烏卽慈鳥。俗呼烏鴉。奪柴爲巢。同類相爭。卽喻過慢。鵲喜鵲也。本非休徵。鳴則頓令人喜。喻增上慢。鳩卽斑鳩。性極庸拙。巢則數柴自足。喻卑劣慢。鴿鳩屬。唐明皇呼爲飛奴。性喜交合。群聚則肆淫無忌。卽喻邪慢。

二喻瞋使

瞋謂於苦苦具增悲爲性能障無瞋不安隱性惡行所依爲業

蛇虺蜈蚣蚰蜒。

瞋有三種。一有理瞋。觸犯方動。二無理瞋。無端自

生。三。諍論。瞋。強執。已是。今此中。𧈧。謂。𧈧。亦名。蜥。蜴。如蛇。而有足。有青綠黑色之別。皆含毒。螫人。與蛇無異。蝮。亦蛇類。螫手。則斬手。螫足。則斬足。否則必死。此三皆潛行暗螫。無故傷人。喻無理瞋。蠍。卽護背蟲。觸背。乃任尾螫人。喻有理瞋。蜈蚣。瞋狠而行速。蚰蜒。漣涎而走滯。此二緩急各異。喻諍論瞋。

三喻疑使。

疑。謂於諸諦理。猶豫爲性。能障不疑善品。爲業。

守宮百足。鼬狸鼯鼠。諸惡蟲輩。交橫馳走。

疑有三種。一疑自。謂疑自非器。二疑師。謂疑師非人。三疑法。謂疑法非真。今此中守宮。亦名。蠍。蜈蚣。漢

宮養以丹砂。取血用梅華印。塗宮女眉間。有邪私者。華印卽散。以能防守宮女淫亂。故以爲名。乃偃伏庭壁。伺蠅蚋而食者。百足似蜒而小。俗呼錢龍。時於壁間往來。而暗夜猶多。此二皆倏出倏入。忽東忽西。若恐懼然。蓋疑自非壯物。時或爲他所傷。喻疑白也。鼯黃鼠。狸狐狸。鼯甘口鼠。噬人而不覺痛者。鼠盜糧鼠。善竊糧食。此四皆多疑之物。如狐狸渡冰。輒登卽退。鼠類出穴。再四不果。蓋疑人所陷害。喻疑師也。諸惡蟲輩。別收不盡之屬。如蜘蛛等。東西交橫。馳走未決。蓋疑所向有難。喻疑法也。

四喻癡使癡謂於諸理事迷暗爲性一切雜染所依爲業

屎尿臭處不淨流溢蜣螂諸蟲而集其上。

屎尿臭處喻癡所著境。癡所著境莫過男女。以彼身爲穢本。類切畫瓶。故喻以屎尿臭處。且彼九孔常流不淨之物。故喻以不淨流溢。蜣螂亦名鐵甲蟲。搏糞爲丸者。諸蟲亦兼蠅蛆。約皆執穢爲淨。而癡心衆生如之。癡心不了。於男女身邊生欲樂想。故喻云而集其上。

五喻貪使貪謂於有有具染著爲性。能障無貪。生苦爲業。

狐狼野干。咀嚼踐踏。齧齧死屍。骨肉狼藉。由是群狗。

競來搏撮。飢羸惴惴。處處求食。鬪諍擅掣。哇喋嗥吠。
貪有三種。一有力貪。如貪官酷吏。強盜劫賊之類。
二計巧貪。如附勢求財。窩盜取利之類。三無力貪。
如僕隸哀索。穴牆竊取之類。今此中狐狼野獸名。
似犬而口大。其色似狐。故名狐狼。性嗜肉食。且能
有力。捕取小兒等物。喻有力貪。野干。出胡地。亦名
胡犬。似狐而小。群行夜鳴。動轉捷疾。不避虎狼。猶
能附彼求食。喻計巧貪。咀嚼者。以口咀嚼。踐踏者。
以足踐踏。喻彼貪得無厭。食其物復擄其財。故。齧
謂以舌舐血。齧謂以齒截骨。弱善之家。恣彼擄掠。

猶若死屍有力計巧盡其財復罄其家何異齧齧針炙之言類此者宜當驚心得來者易恣情拋撒不知珍惜故喻以骨肉狼藉狼藉者謂骨肉零落披靡縱橫如狼卧之藉也由是者承上起下之詞狗屬家畜無力自取或於遺處營逐或於暗地潛就喻無力貪競來搏撮者搏謂搏取狼藉撮謂蹙聚一處喻彼群小交攻雖蠅頭之利亦所必趨也狼藉無幾不足充腹曰飢久飢自瘦皮骨連拉曰羸終日營營常患不足曰惴惴乞餘不足又顧之他曰處處無他所爲口腹是務曰求食總喻小人

蠅利必趨。而所獲無多。常患不足。而到處營求。究其處心。惟思養其口體而已。各欲獨食。互相凌奪。曰鬪。爭彼此撕擊。互相牽拽。曰搥掣。銜物欲食。收聲含鬪。曰哇喋。失物死爭。放聲潑叫。曰嗥吠。總喻小人放利而行。各欲肥家利己。始則鬪爭撕撻。繼則詞訟控訴。如彼分利不均。鬪爭不已。捨身首告者。是也。然此以上五喻。雖言似不經。而意實諄切。借彼蟲名獸狀。警覺舉世人心。與夫孟子所謂人之所以異於禽獸者。幾希。其維持世道之心。如出一轍。讀者當善思之。別喻五鈍竟。

二別喻五利

五利者謂身邊邪見戒也。於所緣境果決剛斷如彼鬼怪有靈故以爲喻。

分二 一結前起後二正喻五利

初

其舍恐怖變狀如是處處皆有魑魅魍魎。

上二句結前禽獸逼人曰恐怖。千差萬別曰變狀。

如是者結歸之詞謂略說恐怖變狀已如是也。下

二句起後言不惟如是且處處皆有魑魅魍魎也。

魑魅魍魎鬼怪總名總喻惡見衆生惡見衆生略

明有五如下所喻詳分則有六十二種徧滿三界

故云處處皆有如此土種種邪教各立門頭邪師

妖黨盈於寰區扇惑無限無知男女生遭王法死

墮地獄。其爲害於生民。何止如魑魅魍魎而已哉。

二正喻五利五。一喻邪見。二喻戒見。三喻身見。

四喻見見。五喻邊見。

初邪見者。謂不敬三寶。不禮塔寺。撥無因果。專事

邪法之類。

夜叉惡鬼。食噉人肉。毒蟲之屬。諸惡禽獸。孳乳產生。各自藏護。夜叉競來。爭取食之。食之旣飽。惡心轉熾。鬬諍之聲。甚可怖畏。

夜叉。此云捷疾。謂行處捷疾。喻邪見智利。緣境迅速也。惡鬼者。食人食物。其性克惡。喻邪見撥無因果。知見不正也。人有少長。喻善因善果。長則細嚼。

而食少則直吞而噉而邪見撥無善因善果如之
毒蟲之屬諸惡禽獸喻惡果從卵孚乳從胎產生
喻惡因惡因成時多畏人知故喻以各自藏護夜
叉競來者飢渴惱急爭取食之者不論大小而邪
見撥無惡因惡果如之法興教立邪見成就如食
之既飽歸從者衆邪見增長如惡心轉熾希自利
養謗他所說如鬪諍之聲從其說者竟入阿鼻如
甚可怖畏古德云似此一般愚男女生遭王法死
阿鼻此之謂也

二喻戒見

戒見者非因計因如牛
狗等戒苦行自持之類

鳩槃荼鬼蹲踞土埵。或時離地一尺二尺。往返遊行。縱逸嬉戲。捉狗兩足。撲令失聲。以脚加頸。怖狗自樂。鳩槃荼。此云甕形。謂其形似甕。喻戒見邪行自恃。空腹高心也。虛坐不實。曰蹲踞。荒阜不正。曰土埵。而戒見依彼邪戒。暫住邪定。不能實住正定如之。乘空遊行。曰或時離地。不能高舉。曰一尺二尺。未能遠達。曰往返遊行。放蕩自恣。曰縱逸嬉戲。而戒見依彼邪定。暫發邪通。不能高舉遠達。不得真實自在如之。邪戒自持。令貪不行。如捉狗兩足。雖令不行。是伏非斷。如撲令失聲。失聲云者。顯非真實。

死也。復以覺觀進伏種子。如以脚加頸。非涅槃因。
計涅槃因。如怖狗自樂。愚昔於鄉邸。遇一外道。彼
自銜其行。以七日不食。名爲打七。目眩華生。名爲
見光。虛火上升。名天門開。卽怖狗自樂之流。吁。邪
教陷人。已至此矣。

三喻身見

身見者。謂於色等五陰。妄計爲身。依之
強立主宰。恒起我見。卽執我我所之流。

復有諸鬼。其身長大。裸形黑瘦。常住其中。發大惡聲。
叫呼求食。

諸見之中。身見居多。故以諸鬼喻之。大成云。豎入
三世計。我名長。橫徧五陰計。我名大。計我自在。不

修善法。卽無慚愧。故言裸形。以惡業莊嚴。無功德資助。故言黑瘦。計我者。不出三界。故言常住其中。計我在心。發言宣說有我之相。故言發大惡聲。冀因此說。證得道果。故言叫呼求食。又發大惡聲者。卽今男誼女雜。宣卷唱偈之類。終日號喊。徹夜高聲。無非希圖利養。以資口體。豈不甚於叫呼求食者哉。

四喻見見

見見者。見取見也。非果計果。如鬱頭藍弗之類。

復有諸鬼。其咽如針。

見見之流。以邪定通至非非想處。旣不同識處之

有想。又不同。無所有處之無想。非有非無。若有若無。故以其咽如針喻之。其咽如針者。餓鬼中針咽鬼也。施食經上師誡論文云。咽喉似針竅之關。一粒米不能透過。卽此鬼耳。

五喻邊見

邊見者。於一身見計斷計常各執一邊之類也。

復有諸鬼。首如牛頭。或食人肉。或復噉狗頭髮鬚亂。殘害兇險。飢渴所逼。叫喚馳走。

牛頭有二角。兩不相到。喻邊見各執一邊。互相是非也。食人噉狗者。喻彼執斷執常。善惡因果以并撥無也。惡因果中。獨以噉狗爲喻者。以貪爲煩惱。

之首舉一以例餘耳。頭髮鬢亂者。兇惡之相。而邊見施爲動作。邪氣逼人如之。殘害者。食人噉狗。兇險者。肆意無忌。而邊見撥無因果。不懼惡報如之。飢渴所逼者。喻彼空修無獲。定慧全缺。叫喚馳走者。喻彼無常一至。叫苦無脫。然此以上五喻。雖絕人已甚。而勢不容辭。所以然者。蓋爲正法難行。邪術易就。以致邪書異教。徧滿寰中。故我世尊。縱出世舌辯。代世間斧斤。剖其肺腑。現其隱微。使其無所逃形於天下後世。與夫孟子拒楊墨。放淫詞。其扶持正教之心。若合一契。吾徒旣爲佛子。當報佛

思至必極力發揮。務使未入其教者聞而不入。已入其教者聞之而出。幸勿礙口姑容。使其涵淹卵育。爲害正法也。別喻五利竟。

三總結二喻

夜叉餓鬼諸惡鳥獸。飢急四向。窺看窓牖。如是諸難。恐懼無量。

利使喻中。略舉夜叉餓鬼。餓鬼卽針咽鬼也。鈍使喻中。略舉諸惡鳥獸。各舉二類。以攝其餘。無善法資助。有惡業逼迫。輪轉四生。如彼飢急四向。無常迅速。方生卽死。無暫停息。如彼窺看窓牖。如是皆

有害於人。故云諸難。喻鈍利二使。皆爲害於世也。旣爲害於世。時時防之。猶恐爲彼所侵。故喻云。恐畏無量。無量者。猶云了不得也。喻三界正報竟。

三喻三界衆苦

是朽故宅。屬於一人。其人近出。未久之間。於後宅舍。忽起火起。四面一時。其燄俱熾。

宅屬一人者。喻三界中。惟佛爲主也。壽量品云。我常在此說法教化。旣云常在。不過暫時捨應。故喻以近出未久。於後指長者去後。去後忽起火起者。喻如來捨應之後。衆生起惑造業。五濁八苦。無狀。

自生也。雖無狀自生。久之愈積愈甚。六道四生。都盧成一苦聚。故喻以四面一時其燄俱熾。

四喻逼迫之相三。一略喻依報之相二。詳喻正報之相三。總結依正二喻。初

棟梁椽柱爆聲震裂。摧折墮落。墻壁崩倒。

棟梁椽柱者。火宅別相。喻三界依報差別。如同報別報之類。爆聲震裂者。火燒發嚮。喻衆苦逼迫之聲。如風鳴地震之類。摧折墮落者。被燒傾動。喻衆苦逼迫之相。如山崩海沸之類。當此之時。四生六道分齊。無不隨衆苦遷變。故又以墻壁崩倒喻之。

二詳喻正報之相。二一喻下界之相。二喻上界之相。初

諸鬼神等。揚聲大叫。鵬鷺諸鳥。鳩槃荼等。周樟惶怖。不能自出。○惡獸毒蟲。藏竄孔穴。毘舍闍鬼。亦住其中。薄福德故。爲火所逼。共相殘害。飲血噉肉。野干之屬。並已前死。諸大惡獸。競來食噉。

初喻人間之相。鬼而曰神。應非尋常之鬼。喻彼邪師。邪師遇苦。則宣邪道妄。希望出離。故喻以揚聲大叫。鵬鷺。仍喻慢使。鳩槃荼。仍喻戒見等之一字。總喻鈍利二使。周樟者。周維。惶樟。惶怖者。恐被火焚。

喻鈍利二使。於六道四生。輪迴往復。亦知衆苦可畏也。雖知衆苦可畏。不請正修。無由出離。故喻以不能自出。○惡獸下喻六天之相。惡獸仍喻貪使。毒蟲仍喻瞋使。不舉餘喻者。以前攝後故。此等被火所燒。穿牆欲避。故云藏竄孔穴。喻人間鈍使衆生。被苦所逼。暫修少善。上生六天也。孔穴者。牆上竇隙。小者爲孔。喻四王忉利二天。大者爲穴。喻夜摩兜率等天。然孔穴雖無猛燄。猶未免於蒸炙。喻四王忉利等天。雖無人間極苦。不能免離五衰相。故旣不免五衰。終非安身立命之處。故以藏竄喻。

之毘舍闍。此云噉精氣。喻六天利使。以彼侵損正法。與夫噉人精氣者無異。雖異鈍使。未超六天。故喻云亦住其中。無真實定慧。以自莊嚴。故喻以薄福德故。有細注衆苦逼迫身心。故喻以爲火所逼。旣無定慧莊嚴。又有衆苦逼迫。自疑其法。互相毀謗。如彼共相殘害。始而毀謗。旣而撥無。如彼飲血噉肉。野干如前。屬兼群狗。並已前死者。喻計巧無力二貪。惟人間有。將生天上。此貪卽斷也。諸大惡獸競來食噉者。喻六天之貪。一味貪著天福。能令計巧無力二貪。永不發於現行也。喻下界之相竟。

二喻上界之相

臭烟蓬煇。四面充塞。蜈蚣蚰蜒。毒蛇之類。爲火所燒。爭走出穴。○鳩槃荼鬼。隨取而食。又諸餓鬼。頭上火然。飢渴熱惱。周憶悶走。

前六句承前起後。臭者鬼畜之氣。烟者猛火之餘。蓬煇者。凝聚之相。喻人間利鈍衆生。不盡餘苦。行相昭然也。旣行相昭然。雖徧歷四生。乃至六天。猶自相隨不離。故喻以四面充塞。四面者。無處不有。喻苦徧四生。充塞者。孔穴必至。喻苦隨六天。蜈蚣蚰蜒等。喻六天瞋使。六天衆苦所逼。進修四禪。上

求色界。故以爲火所燒。爭走出穴。喻之。○後六句。正喻上界。鳩槃荼鬼。喻色界戒見。邪戒自持。伏瞋不行。故喻以隨取而食。所謂上界不行瞋者。以此此色界相也。又諸餓鬼。喻空界利使。苦生空頂。故喻以頭上火然。無無漏食。缺定慧水。故喻以飢渴熱惱。旣無無漏定慧。只得隨業牽引。邪定壞時。仍受輪轉。故喻以周憊悶走。如鬱頭藍弗。下生還作牛。領中蟲。足證此義。此空界相也。詳喻正報之相竟。

三總結依正二喻

其宅如是甚可怖畏。毒害火災。衆難非一。

結上爆聲震裂。摧折墮落。故云其宅如是。若不時出。必爲所傷。故云甚可怖畏。此結依報。喻三界無安。如是不出。必至墮落也。結上禽獸鬼神。大火臭烟。故云毒害火災。若不時出。必爲所害。故云衆難非一。此結正報。喻衆生起惑致苦。不出必從淪墜也。頌能感之衆竟。

三頌結成感義喻

約義略頌

是時宅主。在門外立。聞有人言。汝諸子等。先因遊戲。來入此宅。稚小無知。歡娛樂著。長者聞已。驚入火宅。

在門外立者。喻如來真窮惑盡。久離修斷之門。長行云。能於所燒之門。安隱得出是也。又立者。在外方歸。喻如來他方捨應。將欲示生此界也。將欲示生。領受先佛遺囑。以備當來補處。故喻以聞有人言。有人指先見之人。喻過去先佛也。汝諸子等者。喻先佛示以化機。是如來結緣之子。雖是結緣之子。早退大心。戀著有漏。復淪三界之中。故喻以先因遊戲。來入此宅。稚小無知。喻衆生根鈍智劣。歡娛樂著。喻衆生耽欲著邪。耽欲故。不思厭苦斷集著邪故。不知慕滅修道。義頌長行。心不厭患。無求

出意之喻。長者聞已者。聞而必見。喻如來既受先
佛之囑。必以佛眼觀機。義頌長行。長者見是大火。
從四面起之喻。驚入火宅者。驚而必念。念而方入。
喻如來觀機驚怖。與悲示生。義頌長行。卽大驚怖。
而作是念等喻。頌衆生機感喻竟。

二頌如來化應喻分二。一頌從實施權喻。二頌

會權歸實喻。初二。一頌從實不得喻。二頌隱

實施權喻。初略以合頌

方宜救濟。令無燒害。

方比也。宜當也。謂長者既入火宅。比度擬議。不知

當如何以救之。乃令無有燒害。喻如來既示三界於成道三七日中。思惟群機。不知當如何以度之。乃令免於衆苦。法說章云。如斯之等類。云何而可度。卽此義也。長行云。當以衣裓。若以几案。從舍出之。復更思惟等。皆方宜救濟之義。

二頌隱實施權喻二。一頌先示苦集喻。二頌次

施道滅喻。

初長行有三。今分二。一頌正示苦

缺尋念方便。

集喻。二頌違情不信喻。

初約義廣頌。

告諭諸子。說衆患難。惡鬼毒蟲。灾火蔓莖。衆苦次第。相續不絕。○毒蛇虺蝮。及諸夜叉。鳩槃荼鬼。野干狐。

狗。鵙鷺。鵙。梟。百足之屬。飢渴惱急。甚可怖畏。此苦難處。況復大火。

初喻示苦諦。頌前如所思惟。具告諸子義也。告諭諸子。說衆患難者。喻如來曉諭三乘。廣談三界苦諦。此總喻也。惡鬼。喻惡見。毒蟲。喻瞋毒。三界之中。類多此等之流。不出則常相會遇。卽怨憎會苦也。灾火。義喻餘苦。蔓延者。展轉相然。喻生老病死等。展轉相生。互爲因緣。此別喻也。衆苦二句。法喻通用。喻指宅中衆苦。卽惡鬼毒蟲等。法指界內衆苦。卽怨憎會苦等。次第者。次第而至。相續者。往來循

法華指掌疏
三
環不絕者。周而復始。此總結也。○毒蛇下。喻示集諦。頌前汝等速出義也。毒蛇。蜣蝷等。總喻三界利鈍。言二使衆生。廣造惡業。無定慧資助。有衆苦逼迫。如彼飢渴。惱急。一使有加於己。便喪法身。輒失慧命。如彼甚可怖畏。末二句。有誠勉令出之意。言火宅之中。日與鬼獸禽蟲爲伍。動被損傷之苦。已難處受。况復更有大火。豈可不急思出離。喻三界日與諸使相親。動被習染之苦。已不可當。况復更有八苦交煎。寧可故爲因循。而不速求出離也哉。

二頌違情不信喻

略頌

諸子無知。雖聞父誨。猶故樂著。嬉戲不已。

上二句。頌前父雖憐愍。善言誘諭。但前約父說。此約子聞。聞說互出也。下二句。頌前而諸子等樂著嬉戲等文。但廣略不同。法合準長行可知。頌先示苦集喻竟。

二頌次施道滅喻三。一頌尋念方便喻二頌正施道滅喻三頌適願修證喻。
初義頌

是時長者而作是念。諸子如此。益我愁惱。今此舍宅。無一可樂。而諸子等。耽湎嬉戲。不受我教。將爲火害。即便思惟。設諸方便。

諸子不聽父言。故長者作念。喻衆生不信佛語。故如來思惟。諸子如此者。謂懊恨諸子。何無知已至如此。喻如來慨嗟衆生。何智劣已及若是也。諸子旣入火宅。已切父心。加以不聽父言。故益增愁惱。喻衆生旣墮三界。已關佛意。加以不信佛語。故愈增悲念。此頌長行。爾時長者。卽作是念之義。舍宅無一可樂。喻三界渾成苦聚。耽湎者。貪溺之甚。喻衆生迷倒之極。迷倒之極。不信佛言。故喻以不受我教。不信佛言。必至爲苦所迫。故喻云將爲火害。此頌長行。此舍已爲大火所燒。我及諸子。若不時

出。必爲所焚之義。但長行父子俱焚。與此稍異。要知法身湛寂。本不受焚。但以爲度衆生。示有色身。旣云子焚。卽兼於父。雖異而仍不異也。卽便思惟者。恐爲火燒。設諸方便者。欲施救濟。此頌長行。我今當設方便。令諸子等得免斯害之義。法合可知。

二頌正施道滅喻

略頌

告諸子等。我有種種珍玩之具。妙寶好車。羊車。鹿車。大牛之車。今在門外。汝等出來。吾爲汝等造作此車。隨意所樂。可以遊戲。

知子先心故告。喻如來鑑其宿性乃說。旣言珍玩。

又稱妙寶者。顯其殊勝。令生欣取。喻如來稱歎滅諦。令發慕滅之心。此頌長行。父知諸子先心所好。乃至而告之言。汝等所可玩好。希有難得等義。羊車下。遙示三車在外。喻如來懸示三乘。此頌長行。如此種種羊車鹿車牛車。今在門外之義。教以出來。許以所造之車。隨意所樂者。喻如來勸修道具。許以保任不虛。此頌長行。汝等於此火宅。宜速出來。隨汝所欲。皆當與汝之義。可以遊戲。句全同長行。但前後不同。蓋譯主變其勢耳。

三頌適願修證喻

與長行出沒稍異。屬義頌。

諸子聞說如此諸事。即時奔競馳走而出。到於空地。離諸苦難。

初四句義同長行。惟略去適願勇銳及互相推排之句。到於空地者。即露地而坐。離諸苦難者。即無復障礙。此二句準長行應在下科。蓋順義超頌也。頌從實施權喻竟。

二頌會權歸實喻三。一頌時至機熟喻二頌等賜一乘喻三頌聞法獲益喻。初長行不分。偈頌廣於長行。分

二。一頌時節已至喻二頌根機已熟喻。初約義

廣頌

長者見子。得出火宅。住於四衢。坐師子座。而自慶言。
我今快樂。此諸子等。生育甚難。愚小無知。而入險宅。
多諸毒蟲。魑魅可畏。大火猛燄。四面俱起。而此諸子。
貪樂嬉戲。我已救之。令得脫難。是故諸人。我今快樂。
見子出宅。住於四衢。喻如來見諸衆生。出界得果。
此頌長行。是時長者。見諸子等。安隱得出。皆於四
衢道中之義。不言露坐無礙者。上已超頌故。坐師
下。廣頌其心泰然歡喜踊躍之義。前恐諸子被焚。
不遑寧處。今見諸子出宅。乃坐師座。喻如來昔恐
群機未善。展轉弗寧。今見出界離苦。安住無畏。以

師子有無畏義。故而自慶言者。慶其後嗣不絕。後嗣不絕。則家業有託。故云我今快樂。喻如來自慶。紹隆得人。紹隆得人。則斯道有賴。故佛亦言喜無畏也。生謂初生。喻最初結緣。育謂養育。喻中間教化。已經多劫。故以甚難喻之。愚小無知。喻昔根鈍智劣。根鈍智劣。退墮三有。故喻以而入險宅。毒蟲喻瞋。魑魅喻邪。多諸則時時相逢。可畏則動被損害。仍喻怨憎會苦。大火猛燄。總喻餘苦。徧於四生。彌於六道。故喻以四面俱起。貪樂嬉戲。喻衆生心。不生厭。不求解脫。救令脫難。喻如來已設方便。誘

法華持掌疏
其出離。此長者自釋快樂之意。喻如來自明歡喜
無畏之由。是故諸人。我今快樂者。乃長者呼諸旁
人。結示快樂不虛。喻如來今對法會。結顯歡喜無
畏非妄。如法說章云。舍利弗。當知。鈍根小智人。著
相憍慢者。不能信是法。今我喜無畏是也。

二頌根機已熟喻

廣頌

爾時諸子。知父安坐。皆詣父所。而白父言。願賜我等
三種寶車。如前所許。諸子出來。當以三車。隨汝所欲。
今正是時。惟垂給與。

自覺離苦。便知如來無畏。故喻云。知父安坐。聞說

佛慧自失所住。故喻云皆詣父所。十二鵬疑身子。
三請故喻云而白父言。雖聞權乘非真。不知更求
真實。仍以三乘更求開示。故喻云願賜我等二種
寶車。據昔所說。似有三乘。故喻云如前所許。諸子
出來。當以三車隨欲。今已出界。乍聞所證非真。願
佛務示真實。故喻云今正是時。惟垂給與。此科廣
於長行文勢稍異。但以義合。不必逐句分配。頌時
至機熟喻竟。

二頌等賜一乘喻

長行分二。今缺廢立之由。餘雖大同。爲文稍略。屬略頌。

長者大富。庫藏衆多。金銀琉璃。磑磑碼碯。以衆寶物。

造諸大車。莊校嚴飾。○周匝欄楯。四面懸鈴。金繩交絡。真珠羅網。張施其上。金華諸纓。處處垂下。衆綵雜飾。周匝圍繞。柔軟繒纈。以爲茵褥。上妙細氎。價直千億。鮮白淨潔。以覆其上。○有大白牛。肥壯多力。形體姝好。以駕寶車。多諸僮從。而侍衛之。以是妙車。等賜諸子。

初喻一乘之體。頌前等一大車。衆寶莊校之義。庫藏金銀等。總喻因感功德。以斯功德。成就果體。如衆寶造車。旣成果體。仍用德嚴。如莊校嚴飾。不言高廣者。大義攝故。不言各賜者。留待後故。○周匝

下。喻一乘之相。頌前周匝欄楯。乃至安置丹枕等義。金繩。卽前寶繩。或以金繩貫穿衆寶。故前後互出。羅網。卽前懣蓋。前出其名。此言其相。以懣蓋如羅網相故。前云雜寶嚴飾。此云眞珠者。以眞珠交結爲主。餘寶雜襯爲伴也。金華二句。卽前垂諸華纓。但開合異耳。衆綵者。結上鈴繩華纓。衆多綵色。雜飾者。結上欄楯羅網。雜廁莊飾。周匝圍繞者。喻體具衆相。相嚴一體。此二句。乃補頌語也。柔軟繒纊。帛絮之精且細者。喻諸禪定解脫。非權宗世諦粗浮法也。旣非權宗世諦。乃如來安住之境。故喻

云以爲茵褥。以茵褥乃坐卧之具也。細氎者。微細白氎。喻佛地三昧正受。非世受用。故喻以上而且妙。不易可得。故喻以價直千億。不受餘受。故喻以鮮白淨潔。尅體受用。故喻以而覆其上。此上六句。卽前重敷婉筵。但開略爲廣耳。準長行更有安置丹枕之句。偈略之也。○有大下。喻一乘之用。頌前駕以白牛。乃至僕從侍衛等義。白牛肥壯。卽前膚色充潔。喻一乘之教。多力姝好。喻一乘之理。駕寶車。必步平行疾。喻一乘之行。僮前導。從後隨也。末二句。追頌各賜諸子。長行在前。偈頌變其勢耳。

三頌聞法獲益喻

義頌

諸子是時。歡喜踊躍。乘是寶車。遊於四方。嬉戲快樂。自在無礙。

得未曾有。非本所望。故歡喜踊躍。蓋長行明喜躍之意。偈頌出喜躍之相也。依斯一乘。造就乎常樂我淨之鄉。如乘是寶車。遊於四方。永享法樂。任運乎世出世間之境。如嬉戲快樂。自在無礙。準長行此下更有佛語無虛之喻。以餘疑已斷。故不頌也。頌喻說竟。

二頌法合二 一頌衆生機感二頌如來化應

初三 一頌所感之佛二頌能感之衆三頌結成

感義

初略頌

告舍利弗。我亦如是。衆聖中尊。世間之父。

智斷究竟。群真共仰。故稱衆聖中尊。慈悲廣大。萬類均沾。故稱世間之父。文頌長行。如來則爲一切世間之父。義具佛果。智斷恩之三德。蓋偈頌喻旣從略。法合亦從略也。

二頌能感之衆

義頌

一切衆生。皆是吾子。深著世樂。無有慧心。三界無安。猶如火宅。衆苦充滿。甚可怖畏。常有生老。病死憂患。

如是等火熾然不息。

一切衆生皆是吾子者。有二。一五道衆生名正因子。各具正因故。二三乘衆生名緣因子。昔結大緣故。深著於五欲。如犛牛愛尾。故云深著世樂。以貪愛自蔽。盲瞋無所見。故云無有慧心。此合有五百人。止住其中等喻。以深著世樂。卽具鈍使。無有慧心。亦兼利使故。三界無安。猶如火宅者。法中帶喻。形顯易明。此合有一大宅。其宅久故。而復頓弊等喻。衆苦充滿者。徧於四生。彌於六道。甚可怖畏者。失手錯脚。喪失善根。此合是朽故宅。屬於一人。近

出未久。宅舍火起。四面俱熾等喻。常有生老病死。憂患者。謂衆苦時侵。如是等火熾然不息者。謂周而復始。此合棟梁椽柱。爆聲震裂。摧折墮落。牆壁崩倒等喻。既屬義頌。不必逐一分配長行。

三頌結成感義

義頌

如來已離三界火宅。寂然間居。安處林野。今此三界。皆是我有。其中衆生。悉是吾子。而今此處。多諸患難。久成道果。早脫界繫。故云如來已離三界火宅。無煩惱雜亂。離生死逼迫。故云寂然間居。優游佛地。功德棲息。無餘涅槃。故云安處林野。此合前喻。是

時宅主在門外立也。又喻中言立者。顯大悲弗寧。此中言處者。顯大智絕累。悲智交成。故法喻互顯。佛爲三界之主。故云皆是我有。佛爲衆生之父。故云悉是吾子。旣云悉是。則三乘亦在其中。此合前喻。汝諸子等。先因遊戲。來入此宅。貪著有漏。衆苦常侵。故云而今此處。多諸患難。此合前喻。稚小無知。歡娛樂著。長行云。見諸衆生。爲生老病死憂悲苦惱之所燒煮。卽多諸患難義也。頌衆生機感竟。二頌如來化應。二一頌從實施權。二頌會權歸實。初二一頌從實不得。二頌隱實施權。初

約義
畧頌

惟我一人能爲救護。○雖復教詔而不信受。於諸欲染貪著深故。

首二句頌三七思惟。言如來當時思惟。我爲衆生之父。拔苦與樂。是我之責。除佛如來。無能爲者。故曰惟我一人。能爲救護。救謂拔令離苦。護謂保其得樂。此合前喻。方宜救濟。令無燒害義也。○雖復下頌作念無計。教謂但讚佛乘。教以圓證佛果。詔謂廣施神智。詔以頓超三界。雖復如是而不信受者。以衆生根鈍智劣。不解佛慧。長行云。不能以是

得度是也。於諸欲染貪著深故者。言衆生不能信受。雖由根鈍智劣。亦以貪著欲染。盲蔽慧目。尚未免於衆苦。何能達乎至道。長行云。是諸衆生未免生老病死憂悲苦惱。而爲三界火宅所燒。何由能解佛之智慧是也。

二頌隱實施權

準長行有二。今缺提喻貼合。餘文仍略。乃約義略頌。不曲分也。

以是方便。爲說三乘。令諸衆生。知三界苦。開示演說。出世間道。是諸子等。若心決定。具足三明。及六神通。有得緣覺。不退菩薩。

由前不解佛慧。方便假設諸法。故云以是方便。爲

說三乘。此承上起下語也。令諸衆生。知三界苦者。知苦必當斷集。此頌先示苦集之義。開示下頌次施道滅。復有二義。初頌正施道滅。出世間道。言含二義。一者道因。卽是道諦。二者道果。卽是滅諦。二俱演說。令慕滅而修道也。是諸下頌。適願修證。決定有二義。一者決定忍可。卽聞法信受。二者決定修習。卽殷勤精進。三明者。一宿命明。知過去苦。生大厭離。二天眼明。知未來苦。生大厭離。三漏盡明。能作正觀。斷諸煩惱。六通者。三明之外。更加神境他心。天耳也。以前三具知苦斷集之明。及三世無

礙之通故名明亦名通若神境惟是遠達天耳惟是遠聞他心惟緣別想故但名通不名明耳今明通二皆具足應是聲聞無學此頌聲聞修證不惟此也亦有依佛因緣覺真諦理而得緣覺乘者亦有上求下化精進不退而入菩薩乘者此頌辟支修證及菩薩修證耳辟支乘中不言獨覺者有佛之世從緣悟入者多約多分言也頌從實施權竟二頌會權歸實長行有三。今分二。一頌等賜一乘二頌聞法獲益初長行復二。今缺廢立之由。餘亦義頌。汝舍利弗我爲衆生以此譬喻說一佛乘汝等若能

信受是語。一切皆當成得佛道。是乘微妙清淨第一。
於諸世間。爲無有上。佛所悅可。一切衆生。所應稱讚。
供養禮拜。○無量億千。諸力解脫。禪定智慧。及佛餘
法。○得如是乘。令諸子等。日夜劫數。常得遊戲。

初頌一乘之體。

超頌

先呼汝。後呼名者。表意有所屬。

重其事也。欲令直下承當。就喻要明玄旨。故云以
此譬喻。說一佛乘。若能信受。皆當成佛者。顯一乘
之法。各各有分。長行喻云。爾時長者。各賜諸子等
一大車者。此也是乘微妙清淨第一者。明體具三
德。微妙者。般若德。揀異二乘。執斷纏空。不微妙故。

清淨者。解脫德。揀異人天埋塵戀有不清淨故。第一者。法身德。揀異菩薩分斷分證非第一故。於諸世間者。三世間中。且就情覺而論。惟佛爲最。故云爲無有上。準長行喻云。其車高廣。今體具三德。正顯一乘之廣。世間無上。正顯一乘之高也。佛所悅可者。以是無量功德之所成就故。衆應稱讚等。以具無量功德而爲莊嚴故。喻云。以衆寶物造諸大車。莊校嚴飾者。此也。○無量下。頌一乘之相。追諸力。卽是十力。禪定解脫可知。智慧。卽差別智慧。餘法。則總該一切。長行云。是諸衆生脫三界者。悉與

諸佛禪定解脫等娛樂之具。與此大同。○得如下。
頌一乘之用。乃如來作證勸修之意。意謂我於往
昔經劫修習。已得如是最上一乘。今爲汝等宣說。
無非令諸子等。日不足繼之以夜。積之劫數。常得
遊戲於一乘法中。依此成佛。依此度生耳。長行云。
能生淨妙第一之樂者。此也。又日夜劫數。常得遊
戲者。約喻而言。如現前聞法解悟。永離邪途。起自
利行。如日中遊戲。當來起利他行。入無明夜。教化
衆生。如夜中遊戲。究竟行滿果圓。然後現生現滅。
三世益物。化化不絕。如劫數遊戲。總則旣悟此理。

乘此自利利他成佛度生。但如遊戲。更有何德不具。何樂不生也哉。頌等賜一乘竟。

二頌聞法獲益

長行無文。今依喻中補出。屬補頌。

與諸菩薩及聲聞衆。乘此寶乘。直至道場。

與猶許也。聲聞亦該緣覺。蓋如來面許三乘。聞法獲益之意。意謂向於方等般若。或許成佛。或有不許。今說此經。普許汝諸菩薩及聲聞衆。各各成佛。汝等果能乘此寶乘。精勤修習。管取汝等直至道場。永無諸委曲相。汝等其勉之哉。準喻中直言諸子歡喜。乘是寶車。遊於四方等。卽約自獲。今云與

諸菩薩及聲聞衆等。蓋是佛許。雖法喻文勢不同。而義無殊也。頌法合竟。

三頌結答

以是因緣。十方諦求。更無餘乘。除佛方便。

初說權宗。原爲後會真實。今立真實。自然廢棄權宗。如來旣爾。諸佛亦然。故曰以是因緣。十方諦求。更無餘乘。此結答身子因緣之問。與長行義無殊也。除佛方便者。言縱有權乘。亦是諸佛對機權巧。與我昔年所說。無以異也。執魚目爲明珠。夫豈可哉。正頌長行竟。

法華指掌疏卷二之上

音釋

閔

苦晃切音薤他計切音替欠苦簞切音慼車軻不
跟靜也與剌同除也兼嫌不滿也車軻不

利也上苦感切音閑阿葛切音遏最徂外切音飢

坎下丘何七音五
上七込糸七二量八羽

依據切音漱燕食也兼直陷切實也愆愆普莠切急

又立曰飢坐曰晏
市物失實也
濫惡也

性頁景上魚鱗切則平聲癩也下疑巾切音鉗愚

也又心不則德義之經曰頑口不道忠信

之言嬰厥縛切音嬰驚支義切音至猛榮子營切

曰嚙才以脰取物也。𪔐鳥也。鷹鷂之類。𪔐音榮虫。

屬析易上先的切音錫下夷益切𧈧𧈧上於殄

虫音奕爾雅釋蟲虻蚘蟪蟪音蚘下

典切音殄在草曰蜎蜎在壁曰蜎蜎又小而五虜

色尾青碧者名蜥蜴小而緣牆色黑者曰蠺螭

籠五切音

魯抄掠也

漕河慈航寺鑑慈和尚捐銀五十兩

館陶縣戒弟子濟衆捐錢三十千

新河縣優婆塞弟子趙欽募銀十兩

隆平縣仁村寺弟子普洪捐銀十六兩

敬刊法華指掌疏一卷印造流通願上報

四恩下資三有隨喜見聞同圓種智

